

仁王護國般若波羅蜜經

翔

C40
4514
24

C40-4514

了翁上座請大藏及有
家書置於武藏紫雲山
我微笑踏院扉房中未
為學者不敢許出院內
當山二世鐵牛機謹誌



B 64853

仁王護國般若波羅蜜經目錄

卷上

序品第一

觀空品第二

菩薩教化品第三

二諦品第四

卷下

護國品第五

散華品第六

受持品第七



囑累品第八

囑累品第六
囑累品第七
囑累品第八

仁王護國般若波羅蜜經卷上

姚秦三藏鳩摩羅什譯

序品第一

如是我聞一時佛住王舍城耆闍崛山中與大比丘
衆八百萬億學無學皆阿羅漢有爲功德無爲功德
無學十智有學八智有學六智三根十六心行法假
虛實觀受假虛實觀名假虛實觀三空觀門四諦十
二緣無量功德皆成就復有八百萬億大德緣覺非
斷非常四諦十二緣皆成就復有九百萬億菩薩摩
訶薩皆阿羅漢實智功德方便智功德行獨大悉四

目錄終

眼五通三達十力四無量心四辯四攝金剛滅定一切功德皆成就復有千萬億五戒賢者皆行阿羅漢十地迴向五分法身具足無量功德皆成就復有十千五戒清信女皆行阿羅漢十地皆成就始生功德住生功德終生功德三十生功德皆成就復有十億七賢居士德行具足二十二品十一切入八除入八解脫三慧十六諦四諦四三二一品觀得九十忍一切功德皆成就復有萬萬億九梵三淨三光三梵五喜樂天天定功德定味常樂神通十八生處功德皆成就復有億億六欲諸大天十善果報神通功德皆

成就復有十六大國王各各有一萬二萬乃至十萬眷屬五戒十善三歸功德清信行具足復有五道一切衆生復有他方不可量衆復有變十方淨土現百億高座化百億須彌寶華各各座前華上復有無量化佛無量菩薩比丘八部大衆各各坐寶蓮華華上皆有無量國土一一國土佛及大衆如今無異一一國土中一一佛及大衆各各說般若波羅蜜他方大衆及化衆此三界中衆十二大衆皆來集會坐九級蓮華座其會方廣九百五十里大衆僉然而坐爾時十號三明大滅諦金剛智釋迦牟尼佛初年月八日

方坐十地入大寂室三昧思緣放大光明照三界中復於頂上出千寶蓮華上至非想非非想天光亦復爾乃至他方恒河沙諸佛國土時無色界雨無量變大香華香如車輪華如須彌山王如雲而下十八梵天王雨百變異色華六欲諸天雨無量色華其佛座前自然生九百萬億級華上至非想非非想天是時世界其地六種震動爾時諸大衆俱共僉然生疑各相謂言四無所畏十八不共法五眼法身大覺世尊前已爲我等大衆二十九年說摩訶般若波羅蜜金剛般若波羅蜜天王問般若波羅蜜光讚般若波羅

蜜今日如來放大光明斯作何事時十六大國王中舍衛國王波斯匿王名曰月光德行十地六度三十七品四不壞淨行摩訶衍化次第問居士寶蓋法淨名等八百人復問須菩提舍利弗等五千人復問彌勒師子吼等十千人無能答者時波斯匿王卽以神刀作八萬種音樂十八梵天六欲諸天亦作八萬種音樂聲動三千乃至十方恒河沙佛土有緣斯現彼他方佛國中南方方法才菩薩共五百萬億大衆俱來入此大會東方寶柱菩薩共九百萬億大衆俱來入此大會北方虛空性菩薩共百千萬億大衆俱來入

此大會西方善住菩薩共十恒河沙大衆俱來入此大會六方亦復如是作樂亦然亦復共作無量音樂覺寤如來佛卽知時得衆生根卽從定起方坐蓮華師子座上如金剛山王大衆歡喜各各現無量神通地及虛空大衆而住

觀空品第二

爾時佛告大衆知十六大國王意欲問護國土因緣吾今先爲諸菩薩說護佛果因緣護十地行因緣諦聽諦聽善思念之如法修行時波斯匿王言善大事因緣故卽散百億種色華變成百億寶帳蓋諸大衆

爾時大王復起作禮白佛言世尊一切菩薩云何護佛果云何護十地行因緣佛言菩薩化四生不觀色如受想行識如衆生我人常樂我淨如知見壽者如菩薩如六度四攝一切行如二諦如是故一切法性眞實空不來不去無生無滅同眞際等法性無二無別如虛空是故陰入界無我無所有相是爲菩薩行化十地般若波羅蜜白佛言若諸法爾者菩薩護化衆生爲化衆生耶大王法性色受想行識常樂我淨不住色不住非色不住非非色乃至受想行識亦不住非非住何以故非色如非非色如世諦故三假故

經

仁王護國神咒

四

辨

名見衆生一切法性實故乃至諸佛三乘七賢八聖亦名見六十二見亦名見大王若以名名見一切法乃至諸佛三乘四生者非非見一切法也白佛言般若波羅蜜有法非非法摩訶衍云何照大王摩訶衍見非非法法若非非法是名非非法空法性空色受想行識空十二入十八界空六大法空四諦十二緣空是法卽生卽住卽滅卽有卽空剎那剎那亦如是法生法住法滅何以故九十剎那爲一念一念中一剎那經九百生滅乃至色一切法亦如是以般若波羅蜜空故不見緣不見諦乃至一切法空內空外空

內外空有爲空無爲空無始空性空第一義空般若波羅蜜空因空佛果空空故空但法集故有受集故有名集故有因集故有果集故有十行故有佛果故有乃至六道一切有善男子若菩薩見法衆生我人知見者斯人行世間不異於世間於諸法而不動不到不滅無相無無相一切法亦如也諸佛法僧亦如也是卽初地一念心具足八萬四千般若波羅蜜卽載名摩訶衍卽滅爲金剛亦名定亦名一切行如光讚般若波羅蜜中說大王是經名味句百佛千佛百千萬佛說名味句於恒河沙三千大千國中成

無量七寶施三千大千國中衆生皆得七賢四果
不如於此經中起一念信何況解一句者句非句非
非句故般若非句句非般若般若亦非菩薩何以故
十地三十生空故始生住生終生不可得地地中三
生空故亦非薩婆若非摩訶衍空故大王若菩薩見
境見智見說見受者非聖見也倒想見法凡夫人也
見三界者衆生果報之名也六識起無量欲無窮名
爲欲界藏空或色所起業果名爲色界藏空或心所
起業果名無色界藏空三界空三界根本無明藏亦
空三地九生滅前三界中餘無明習果報空金剛菩
薩藏得理盡三昧故或果生滅空有果空因空故空
薩婆若亦空滅果空或前已空故佛得三無爲果智
緣滅非智緣滅虛空薩婆若果空也善男子若有修
習聽說無聽無說如虛空法同法性聽同說同一切
法皆如也大王菩薩修護佛果爲若此護般若波羅
蜜者爲護薩婆若十力十八不共法五眼五分法身
四無量心一切功德果爲若此佛說法時無量人衆
皆得法眼淨性地信地有百千人皆得大空菩薩大
行

菩薩教化品第三

行

白佛言世尊護十地行菩薩云何行可行云何行化
衆生以何相衆生可化佛言大王五忍是菩薩法伏
忍上中下信忍上中下順忍上中下無生忍上中下
寂滅忍上中下名爲諸佛菩薩修般若波羅蜜善男
子初發相信恒河沙衆生修行伏忍於三寶中生習
種性十心信心精進心念心慧心定心施心戒心護
心願心迴向心是爲菩薩能少分化衆生已超過二
乘一切善地一切諸佛菩薩長養十心爲聖胎也次
第起乾慧性種性有十心所謂四意止身受心法不
淨苦無常無我也三意止三善根慈施慧也三意止

所謂三世過去因忍現在因果忍未來果忍也是菩
薩亦能化一切衆生已能過我人知見衆生等想及
外道倒想所不能壞復有十道種性地所謂觀色識
想受行得戒忍知見忍定忍慧忍解脫忍觀三界因
果空忍無願忍無相忍觀二諦虛實一切法無常名
無常忍一切法空得無生忍是菩薩十堅心作轉輪
王亦能化四天下生一切衆生善根又信忍菩薩所
謂善達明中行者斷三界色煩惱縛能化百佛千佛
萬佛國中現百身千身萬身神通無量功德常以十
五心爲首四攝法四無量心四弘願三解脫門是菩

薩從善地至於薩婆若以此十五心爲一切行根本
種子又順忍菩薩所謂見勝現法能斷三界心等煩
惱縛故現一身於十方佛國中無量不可說神通化
衆生又無生忍菩薩所謂遠不動觀慧亦斷三界心
色等習煩惱故現不可說不可說功德神通復次寂
滅忍佛與菩薩同用此忍入金剛三昧下忍中行名
爲菩薩上忍中行名爲薩婆若共觀第一義諦斷三
界心習無明盡相爲金剛盡相無相爲薩婆若超度
世諦第一義諦之外爲第十一地薩云若覺非有非
無湛然清淨常住不變同實際等法性無緣大悲教

化一切衆生乘薩婆若乘來化三界善男子一切衆
生煩惱不出三界藏一切衆生果報二十二根不出
三界諸佛應化法身亦不出三界三界外無衆生佛
何所化是故我言三界外別有一衆生界藏者外道
大有經中說非七佛之所說大王我常說一切衆生
斷三界煩惱果報盡者名爲佛自性清淨名覺薩云
若性衆生本業是諸佛菩薩本所修行五忍中十四
忍具足白佛言云何菩薩本業清淨化衆生佛言從
一地乃至後一地自所行處及佛行處一切知見故
本業者若菩薩住百佛國中作閻浮四天王修百法

經 卷一 九

門二諦平等心化一切衆生初若菩薩住千佛國中

作忉利天王修千法門十善道化一切衆生地二若菩

薩住十萬佛國中作燄天王修十萬法門四禪定化

一切衆生地三若菩薩住百億佛國中作兜率天王修

百億法門行道品化一切衆生地四若菩薩住千億佛

國中作化樂天王修千億法門二諦四諦八諦化一

切衆生地五若菩薩住十萬億佛國中作他化天王修

十萬億法門十二因緣智化一切衆生地六若菩薩住

百萬億佛國中作初禪王修百萬億法門方便智願

智化一切衆生地七若菩薩住百萬微塵數佛國中作

二禪梵王修百萬微塵數法門雙照方便神通智化

一切衆生地八若菩薩住百萬億阿僧祇微塵數佛國

中作三禪大梵王修百萬億阿僧祇微塵數法門四

無礙智化一切衆生地九若菩薩住不可說不可說佛

國中作第四禪大靜天王三界主修不可說不可說

法門得理盡三昧同佛行處盡三界原教化一切衆

生如佛境界是故一切菩薩本業化行淨地十若十方

諸如來亦修是業登薩婆若果作三界王化一切無

量衆生地佛爾時百萬億恒河沙大衆各從座起散無

量不可思議華燒無量不可思議香供養釋迦牟尼

佛及無量大菩薩合掌聽波斯匿王說般若波羅蜜

今於佛前以偈歎曰

世尊導師金剛體

心行寂滅轉法輪

八辯洪音爲衆說

時衆得道百萬億

時六天人出家道

成比丘衆菩薩行

五忍功德妙法門

十四正士能諦了

三賢十聖忍中行

惟佛一人能盡源

佛衆法海三寶藏

無量功德攝在中

十善菩薩發大心

長別三界苦輪海

中下品善粟散王

上品十善鐵輪王

習種銅輪二天下

銀輪三天性種性

道種堅德轉輪王

七寶金光四天下

伏忍聖胎三十人

十信十止十堅心

三世諸佛於中行

無不由此伏忍生

一切菩薩行本源

是故發心心信難

若得信心必不退

進入無生初地道

教化衆生覺中行

是名菩薩初發心

善覺菩薩四天王

雙照二諦平等道

權化衆生遊百國

始登一乘無相道

入理般若名爲住

住生德行名爲地

初住一心足德行

於第一義而不動

離達開士初利王

現行六道千國土

無緣無相第三諦

無無無生無二照

明慧空照燄天王

應形萬國導羣生

忍心無二三諦中

出有人無變化生

善覺離明三道人

能滅三界色煩惱

還觀三界身口色

法性第一無遺照

燄慧妙光大精進

兜率天王遊億國

實智緣寂方便道

達無生照空有了

勝慧三諦自達明

化樂天王百億國

空空諦觀無二相

變化六道入無間

法現開士自在王

無二無照達理空

三諦現前大智光

照千億土教一切

燄勝法現無相定

能灑三界迷心惑

空慧寂然無緣觀

還觀心空無量報

遠達無生初禪王

常萬億土教眾生

未度報身一生在

進入等觀法流地

始入無緣金剛忍

三界報形永不受

觀第三義無二照

二十一生空寂行

三界愛習順道定

遠達正士獨諦了

等觀菩薩二禪王	變生法身無量光
入百恒土化一切	圓照三世恒劫事
反照樂虛無盡源	於第三諦常寂然
慧光開士三禪王	能於千恒一時現
常在無為空寂行	恒沙佛藏一念了
灌頂菩薩四禪王	於億恒土化羣生
始入金剛一切了	二十九生永已度
寂滅忍中下忍觀	一轉妙覺常湛然
等慧灌頂三品士	除前餘習無明緣
無明習相故煩惱	二諦理窮一切盡

圓智無相三界王	三十生盡等大覺
大寂無為金剛藏	一切報盡無極悲
第一義諦常安隱	窮源盡性妙智存
三賢十聖住果報	惟佛一人居淨土
一切眾生暫住報	登金剛原居淨土
如來三業德無極	我今月光禮三寶
法王無上人中樹	覆蓋大眾無量光
口常說法非無義	心智寂滅無緣照
人中師子為眾說	大眾歡喜散金率
百億萬土六大動	含生之生受妙報

天尊快說十四王

是故我今略歎佛

時諸大眾聞月光王歎十四王無量功德藏得大法
利卽於座中有十恒河沙天王十恒河沙梵王十恒
河沙鬼神王乃至三趣得無生法忍八部阿須輪王
現轉鬼身天上受道三生入正位者或四生五生乃
至十生得入正位證聖人性得一切無量報佛告諸
得道果實大眾善男子是月光王已於過去十千劫
中龍光王佛法中爲四住開士我爲八住菩薩今於
我前大師子吼如是如是如汝所解得真義說不可
思議不可度量惟佛與佛乃知斯事善男子其所說

十四般若波羅蜜三忍地地上中下三十忍一切行
藏一切佛藏不可思議何以故一切諸佛是中生是
中滅是中化無生無滅無化無自無他第一無二非
化非不化非無無相無來去如虛空故一切衆生無
生滅無縛解非因非果非不因果煩惱我人知見受
者我所者一切苦受行空故一切法集幻化五陰無
合無散法同法性寂然空故法境界空空無相不轉
不顛倒不順幻化無三寶無聖人六道如虛空故般
若無知無見不行不緣不因不受不得一切照相故
行道相斯行道相如虛空故法相如是可有心得

無心得是以般若功德不可衆生中行而行不可五陰法中行而行不可境中行而行不可解中行而行是故般若不可思議而一切諸菩薩於中行故亦不可思議一切諸如來於幻化無住法中化亦不可思議善男子此功德藏假使無量恒河沙第十三灌頂開士說是功德百千億分中如王所說如海一滴我今略述分義功德有大利益一切衆生亦爲過去來今無量諸如來之所述可三賢十聖讚歎無量是月光王分義功德善男子是十四法門三世一切衆生一切三乘一切諸佛之所修習未來諸佛亦復如是

若一切諸佛菩薩不由此門得薩婆若者無有是處何以故一切諸佛及菩薩無異路故是故一切諸善男子若有人聞諸忍法門信忍止忍堅忍善覺忍離達忍明慧忍燄慧忍勝慧忍法現忍遠達忍等覺忍慧光忍灌頂忍圓覺忍者是人超過百劫千劫無量恒河沙生生苦難入此法門現身得報時諸衆中十億同名虛空藏海菩薩歡喜法樂各各散華於虛空中變成無量華臺上有無量大衆說十四正行十八梵六欲天王亦散寶華各坐虛空臺上說十四正行受持讀誦解其理義無量諸鬼神現身修行般若波

羅蜜佛告大王汝先言云何衆生相可化若以幻化身見幻化者是菩薩真行化衆生衆生識初一念識異木石生得善生得惡惡爲無量惡識本善爲無量善識本初一念金剛終一念於中生不可說不可說識成衆生色心衆生根本色名色蓋心名識蓋想蓋受蓋行蓋蓋者陰覆爲用身名積聚大王此一色法生無量色眼所得爲色耳所得爲聲鼻所得爲香舌得爲味身得爲觸堅持名地水名潤火名熱輕動名風生五識處名根如是一色一心有不可思議色心大王凡夫六識麤故得假名青黃方圓等無量假色法聖人六識淨故得實法色香味觸一切實色法衆生者世諦之名也若有若無但生衆生憶念名爲世諦世諦假誑幻化故有乃至六道幻化衆生見幻化幻化見幻化婆羅門刹利毗舍首陀神我等色心名爲幻諦幻諦法無佛出世前無名字無義名幻法幻化無名字無體相無三界名字無善惡果報六道名字大王是故佛佛出現於世爲衆生故說作三界六道名字是名無量名字如空法四大法心法色法相續假法非一非異一亦不續異亦不續非一非異故名續諦相待假法一切名相待亦名不定相待如五

色等法有無一切等法一切法皆緣成假成衆生俱時因果異時因果三世善惡一切幻化是幻諦衆生大王若菩薩如上所見衆生幻化皆已假誑如空中華十住菩薩諸佛五眼如幻諦而見菩薩化衆生爲若此時諸有無量天子及諸大衆得伏恐者得空無生忍乃至一地十地不可說德行

二諦品第四

爾時波斯匿王言第一義諦中有世諦不若言無者智不應二若言有者智不應一一二之義其事云何佛告大王汝於過去七佛已問一義二義汝今無聽我今無說無聽無說卽爲一義二義故諦聽諦聽善思念之如法修行七佛偈如是

無相第一義 無自無他作 因緣本自有

無自無他作 法性本無性 第一義空如

諸有本有法 三假集假有 無無諦實無

寂滅第一空 諸法因緣有 有無義如是

有無本自二 譬若牛二角 照解見無二

二諦常不卽 解心見不二 求二不可得

非謂二諦一 非二何可得 於解常自一

於諦常自二 通達此無二 眞入第一義

世諦幻化起 譬如虛空華 如影三手無
因緣故誑有 幻化見幻化 衆生各幻諦
幻師見幻法 諦實則皆無 名爲諸佛觀
菩薩觀亦然

大王菩薩摩訶薩於一義中常照二諦化衆生佛及
衆生一而無二何以故以衆生空故得置菩提空以
菩提空故得置衆生空以一切法空故空空何以故
般若無相二諦虛空般若空於無明乃至薩婆若無
自相無他相故五眼成就時見無所見行亦不受不
行亦不受非行非不行亦不受乃至一切法亦不受
菩薩未成佛時以菩提爲煩惱菩薩成佛時以煩惱
爲菩提何以故於第一義而不二故諸佛如來乃至
一切法如故曰佛言云何十方諸如來一切菩薩不
離文字而行諸法相大乘法輪者法本如重誦如受
記如不誦偈如無問而自說如戒經如譬喻如法界
如本事如方廣如未曾有如論義如是名味句音聲
果文字記句一切如若取文字者不行空也大王如
如文字修諸佛智母一切衆生性根本智母卽爲薩
婆若體諸佛未成佛以當佛爲智母未得爲性已得
薩婆若三乘般若不生不滅自性常住一切衆生以

此爲覺性故若菩薩無受無文字離文字爲非文字
修無修爲修修無修者得般若真性般若波羅蜜大
王若菩薩護佛護化衆生護十地行爲若此白佛言
無量品衆生根亦無量行亦無量法門爲一爲二爲
無量耶大王一切法觀門非一非二乃有無量一切
法亦非有相非非無相若菩薩見衆生見一見二卽
不見一不見二一二者第一義諦也大王若有若無
者卽世諦也以三諦攝一切法空諦色諦心諦故我
說一切法不出三諦我人知見五受陰空乃至一切
法空衆生品品根行不同故非一非二法門大王七
佛說摩訶般若波羅蜜我今說般若波羅蜜無二無
別汝等大衆受持讀誦解說是經功德有無量不可
說不可說諸佛一一佛教化無量不可說衆生一一
衆生皆得成佛是佛復教化無量不可說衆生皆得
成佛是上三佛說般若波羅蜜經八萬億偈於一偈
中復分爲千分於一分中說一分句義不可窮盡況
復於此經中起一念信是諸衆生起百劫千劫十地
等功德何況受持讀誦解說者功德卽十方諸佛等
無有異當知是人卽是如來得佛不久時諸大衆聞
說是經十億人得三空忍百萬億人得大空忍十地

性大王此經名爲仁王問般若波羅蜜經汝等受持
般若波羅蜜經是經復有無量功德名爲護國土功
德亦名一切國王法藥服行無不大用護舍宅功德
亦護一切衆生身卽此般若波羅蜜是護國土如城
塹牆壁刀劔鉞楯汝應受持般若波羅蜜亦復如是
仁王護國般若波羅蜜經卷上

校訛

第十八紙十一行

爲非南作非非

十二行

修無修者南作爲修文字者

音釋

寤

音悟寤寤寤寤

摩訶衍

梵語也此云大乘衍音演

城塹

塹七黠切繞城水也

楯

鉞莫侯切鉤兵也楯乳尹切干櫓之屬

仁王護國般若波羅蜜經卷下

姚秦三藏鳩摩羅什譯

護國品第五

爾時佛告大王汝等善聽吾今正說護國土法用汝
當受持般若波羅蜜當國土欲亂破壞劫燒賊來破
國時當請百佛像百菩薩像百羅漢像百比丘衆四
大衆七衆共聽請百法師講般若波羅蜜百師子吼
高座前然百燈燒百和香百種色華以用供養三寶
三衣什物供養法師小飯中食亦復以時大王一日
二時講經汝國土中有百部鬼神是一一部復有百

部樂聞是經此諸鬼神護汝國土大王國土亂時先
鬼神亂鬼神亂故萬民亂賊來劫國百姓亡喪臣君
太子王子百官共生是非天地怪異二十八宿星道
日月失時失度多有賊起大王若火難水難風難一
切諸難亦應講此經法用如上說大王不但護國亦
有護福求富貴官位七寶如意行來求男女求慧解
名聞求六天果報人中九品果報亦講此經法用如
上說大王不但護福亦護衆難若疾病苦難杻械枷
鎖檢繫其身破四重罪作五逆因作八難罪行六道
事一切無量苦難亦講此經法用如上說大王昔日
有王釋提桓因爲頂生王來上天欲滅其國時帝釋
天王卽如七佛法用敷百高座請百法師講般若波
羅蜜頂生卽退如滅罪經中說大王昔有天羅國王
有一太子欲登王位一名班足太子爲外道羅陀師
受教應取千王頭以祭家神自登其位已得九百九
十九王少一王卽北行萬里卽得一王名普明王其
普明王白班足王言願聽一日飯食沙門頂禮三寶
其班足王許之一日時普明王卽依過去七佛法請
百法師敷百高座一日二時講般若波羅蜜八千億
偈竟其第一法師爲王卽說偈言

劫燒終訖 乾坤洞然 須彌巨海

都為灰颺 天龍福盡 於中凋喪

二儀尚頌 國有何常 生老病死

輪轉無際 事與願違 憂悲為害

欲深禍重 瘡疣無外 三界皆苦

國有何賴 有本自無 因緣成諸

盛者必衰 實者必虛 衆多蠢蠢

常如幻居 聲響俱空 國土亦如

識神無形 假乘四蛇 無明保養

以為樂事 形無常主 神無常家

形神尚離 豈有國耶

爾時法師說此偈已時普明王眷屬得法眼空王自
證得虛空等定聞法悟解還至天羅國班足王所衆
中即告九百九十九王言就命時到人人皆應誦過
去七佛仁王問般若波羅蜜經中偈句時班足王問
諸王言皆誦何法普明王即以上偈答王王聞是法
得空三昧九百九十九王亦聞法已皆證三空門是
時班足王極大歡喜告諸王言我為外道邪師所誤
非君等過汝可還本國各各請法師講般若波羅蜜
名味句時班足王以國付弟出家為道證無生法忍

經 三度國太子校量家經下 三 羽七

如十王經中說五千國王常誦是經現世生報大王
十六大國王修護國之法應亦如是汝當受持天上
人中六道衆生皆應受持七佛名味句未來世中有
無量小國王欲護國土亦復爾者應請法師說般若
波羅蜜爾時釋迦牟尼佛說般若波羅蜜時衆中五
百億人得入初地復有六欲諸天子八十萬人得性
空地復有十八梵得無生忍得無生法樂忍復有先
已學菩薩者證一地二地三地乃至十地復有八部
阿須輪王得一三昧門得二三昧門得轉鬼身天上
正受在此會者皆得自性信乃至無量空信吾今略
說天等功德不可具盡

散華品第六

爾時十六大國王聞佛說十萬億偈般若波羅蜜歡
喜無量卽散百萬億行華於虛空中變爲一座十方
諸佛共坐一座說般若波羅蜜無量大衆共坐一座
持金羅華散釋迦牟尼佛上成萬輪華蓋蓋大衆上
復散八萬四千般若波羅蜜華於虛空中變成白雲
臺臺中光明王佛共無量大衆說般若波羅蜜臺中
大衆持雷吼華散釋迦牟尼佛及諸大衆復散妙覺
華於虛空中變作金剛城中師子吼王佛共十方

佛大菩薩論第一義諦時城中菩薩持光明華散釋迦牟尼佛上成一華臺臺中十方佛及諸天人散天華於釋迦牟尼佛上虛空中成紫雲蓋覆三千大千世界蓋中天人散恒河沙華如雲而下時諸國王散華供養已願過去佛現在佛未來佛常說般若波羅蜜願一切受持者比丘比丘尼信男信女所求如意常行般若波羅蜜佛告大王如是如是如王所說般若波羅蜜應說應受是諸佛母諸菩薩母神通生處時佛爲王現五不思議神變一華入無量華無量華入一華一佛土入無量佛土無量佛土入一佛土無量佛土入一毛孔土一毛孔土入無量毛孔土無量須彌無量大海入芥子中一佛身入無量衆生身無量衆生身入一佛身入六道身入地水火風身佛身不可思議衆生身不可思議世界不可思議佛現神足時十方諸天人得佛華三昧十恒河沙菩薩現身成佛三恒河沙八部王成菩薩道十千女人現身得神通三昧善男子是般若波羅蜜有三世利益過去已說現在今說未來當說諦聽諦聽善思念之如法修行

受持品第七

爾時月光王心念口言見釋迦牟尼佛現無量神力亦見千華臺上寶滿佛是一切佛化身主復見千華葉世界上佛其中諸佛各各說般若波羅蜜白佛言如是無量般若波羅蜜不可說不可解不可以識識云何諸善男子於此經中明了覺解如法爲一切衆生開空法道大牟尼言有修行十三觀門諸善男子爲大法王從習忍至金剛頂皆爲法師依持建立汝等大衆應如佛供養而供養之應持百萬億天華天香而以奉上善男子其法師者是習種性菩薩若在家婆蹉優婆蹉若出家比丘比丘尼修行十信自觀已身地水火風空識分分不淨復觀十四根所謂五情五受男女意命等根有無量罪過故卽發無上菩提心常修三界一切念念皆不淨故得不淨忍觀門任在佛家修六和敬所謂三業同戒同見同學行八萬四千波羅蜜道善男子習忍以前行十善菩薩有退有進譬如輕毛隨風東西是諸菩薩亦復如是雖以十千劫行十正道發三菩提心乃當入習忍位亦常學三伏忍法而不可字名是不定人是定人者入生空位聖人性故必不起五逆六重二十八輕佛法經書作反逆罪言非佛說無有是處能以一阿僧祇

劫修伏道忍行始得入僧伽位復次性種性行十
慧觀滅十顛倒及我人知見分分假偽但有名但有
受但有法不可得無定相無自他相故修護空觀亦
常行百萬波羅蜜念念不去心以二阿僧祇劫行十
正道法住波羅陁位復次道種性住堅忍中觀一切
法無生無住無滅所謂五受三界二諦無自他相如
實性不可得故而常入第十第一義諦心心寂滅而
受生三界何以故業習果報未壞盡故順道生復以
三阿僧祇劫修八萬億波羅蜜當得平等聖人地故
住阿毗跋致正位復次善覺摩訶薩住平等忍修行

四攝念念不去心入無相捨滅三界貪煩惱於第一
義諦而不二爲法性無爲緣理而滅一切相故爲智
緣滅無相無爲住初忍時未來無量生死不由智緣
而滅故非智緣滅無相無爲無自他相無無無相故
無量方便皆現前觀實相方便者於第一義諦不沉
出不轉不顛倒徧學方便者非證非不證而一切
學迴向方便者非住果非不住果而向薩婆若魔自
在方便者於非道而行佛道四魔所不動一乘方便
者於不二相通達衆生一切行故變化方便者以願
力自在生一切淨佛國土如是善男子是初覺智於

有無相而不二是實智照巧用不證不沉不出不到是方便觀譬如水之與波不一不異乃至一切行波羅蜜禪定陀羅尼不一不二故而一一行成就以四阿僧祇劫行行故入此功德藏門無三界業習生故畢故不造新以願力故變化生一切淨土常修捨觀故登鳩摩羅伽位以四大寶藏常授與人復次德慧菩薩以四無量心滅三有瞋等煩惱住中忍中行一切功德故以五阿僧祇劫行大慈觀心心常現在前入無相閻陀波羅化一切衆生復次明慧道人常以無相忍中行三明觀知三世法無來無去無住處心

心寂滅盡三界癡煩惱得三明一切功德觀故常以六阿僧祇劫集無量明波羅蜜故入伽羅陀位無相行受持一切法復次爾燄聖覺達菩薩修行順法忍逆五見流集無量功德住須陀洹位常以天眼天耳宿命他心身通於念念中滅三界一切見亦以七阿僧祇劫行五神通恒河沙波羅蜜常不離心復次勝達菩薩於順道忍以四無畏觀那由他諦內道論外道論藥方工巧呪術故我是一切智人滅三界疑等煩惱故我相已盡知地地有所出故名出道有所不出故名障道逆三界疑修集無量功德故卽入斯陀

舍位復集行八阿僧祇劫中行諸陀羅尼門故常行
無畏觀不去心復次常現真實住順忍中作中道觀
盡三界集因集業一切煩惱故觀非有非無一相無
相而無二證阿那含位復作九阿僧祇劫集照明中
道故樂力生一切佛國土復次玄達菩薩十阿僧祇
劫中修無生法樂忍滅三界習因業果住後身中無
量功德皆成就無生智盡智五分法身皆滿足住第
十地阿羅漢梵天位常行三空門觀百千萬三昧具
足弘化法藏復次等覺者住無生忍中觀心心寂滅
而無相相無身身無知知而用心乘於羣方之方愴
怕住於無住之住在有常修空處空常萬化雙照一
切法故知是處非是處乃至一切智十力觀故而能
摩訶羅伽位化一切國土衆生千阿僧祇劫行十力
法心心相應常人見佛三昧復次慧光神變者住上
上無生忍滅心心相法眼見一切法三昧色空見以
大願力常生一切淨土萬阿僧祇劫集無量佛光三
昧而能現百萬恒河沙諸佛神力住婆伽梵位亦常
入佛華三昧復次觀佛菩薩住寂滅忍者從始發心
至今經百萬阿僧祇劫修百萬阿僧祇劫功德故證
一切法解脫住金剛臺善男子從習忍至頂三昧皆

名爲伏一切煩惱而無相信滅一切煩惱生解脫智
照第一義諦不名爲見所謂見者是薩婆若是故我
從昔以來常說惟佛所知見覺頂三昧以下至於習
忍所不知不見不覺唯佛頓解不名爲信漸漸伏者
慧雖起滅以能無生無滅此心若滅則累無不滅無
生無滅入理盡金剛三昧同真際等法性而未能等
無等等譬如有人登大高臺下觀一切無不斯了住
理盡三昧亦復如是常修一切行滿功德藏入婆伽
度位亦復常住佛慧三昧善男子如是諸菩薩皆能
一切十方諸如來國土中化衆生正說正義受持讀

誦解達實相如我今日等無有異佛告波斯匿王我
當滅度後法滅盡時受持般若波羅蜜大作佛事一
切國土安立萬姓快樂皆由此般若波羅蜜是故付
囑諸國王不付囑比丘比丘尼清信男清信女何以
故無王力故故不付囑汝當受持讀誦解其義理大
王吾今所化百億須彌百億日月一一須彌有四天
下其南閻浮提有十六大國五百中國十千小國其
國土中有七可畏難一切國王爲是難故講讀般若
波羅蜜七難卽滅七福卽生萬姓安樂帝王歡喜云
何七難日月失度時節反逆或赤日出黑日出二三

四五日出或日蝕無光或日輪一重二三四五重輪
現當變怪時讀說此經爲一難也二十八宿失度金
星彗星輪星鬼星火星水星風星刀星南斗北斗五
鎮大星一切國王星三公星百官星如是等星各各
變現亦講說此經爲二難也大火燒國萬姓燒盡或
鬼火龍火天火山神火人火樹木火賊火如是變怪
亦讀說此經爲三難也大水漂沒百姓時節反逆冬
兩夏雪冬時雷電霹靂六月雨冰霜雹雨赤水黑水
青水雨水山石山雨沙礫石江河逆流浮山流石如
是變時亦讀說此經爲四難也大風吹殺萬姓國土

山河樹木一時滅沒非時大風黑風赤風青風天風
地風火風如是變時亦讀誦此經爲五難也天地國
土亢陽炎火洞然百草亢旱五穀不登土地赫然萬
姓滅盡如是變時亦讀說此經爲六難也四方賊來
侵國內外賊起火賊水賊風賊鬼賊百姓荒亂刀兵
劫起如是怪時亦讀誦此經爲七難也大王是般若
波羅蜜是諸佛菩薩一切衆生心識之神本也一切
國王之父母也亦名神符亦名辟鬼珠亦名如意珠
亦名護國珠亦名天地鏡亦名龍寶神王佛告大王
應作九色幡長九丈九色華高二丈千支燈高五丈

九玉箱九玉巾亦作七寶案以經置上若王行時常
施其前足一百步是經常放千光明令千里內七難
不起罪過不生若王住時作七寶帳帳中七寶高座
以經卷置上日日供養散華燒香如事父母如事帝
釋大王我今五眼明見三世一切國王皆由過去侍
五百佛得爲帝王王是爲一切聖人羅漢而爲來生
彼國作大利益若王福盡時一切聖人皆爲捨去若
一切聖人去時七難必起大王若未來世國王受持
三寶者我使五大菩薩往護其國一金剛吼菩薩
手持千寶相輪往護彼國二龍王吼菩薩手持金輪

燈往護彼國三無畏十力吼菩薩手持金剛杵往護
彼國四雷電吼菩薩手持千寶羅網往護彼國五無
量力吼菩薩手持五十劔輪往護彼國五大士五千
大神王於汝國中大作利益當立像形而供養之大
王吾今三寶付囑汝等一切諸王憍薩羅國毗舍離
國舍衛國摩竭提國波羅柰國迦夷羅衛國鳩尸那
國鳩唎彌國鳩留國罽賓國伽羅乾國乾陀衛國沙
陀國僧伽陀國捷拏掘闍國波提國如是一切國受
持般若波羅蜜時諸大衆阿須輪王聞佛說未來世
七可畏身毛爲豎呼聲大叫而言願不生彼國時十

石三國傳卷之八
卷之八
六六國王卽以國事付弟出家修道觀四大四色勝
出相四大四色不用識空入行相三十忍初地相第
一義諦九地相是爲大王捨凡夫身入六住身捨七
報身入八法身證一切行般若波羅蜜十八梵天阿
須輪王得三乘觀同無生境復散華供養空華法性
華聖人華順華無生華法樂華金剛華緣觀中道華
三十七品華而散佛上及九百億大菩薩衆其餘一
切衆證道迹果散心空華心樹華六波羅蜜華妙覺
華而散佛上及一切衆十千菩薩念來世衆生卽證
妙覺三昧圓明三昧金剛三昧世諦三昧真諦三昧
第一義諦三昧此三諦三昧是一切三昧王三昧亦
得無量三昧七財三昧二十五有三昧一切行三昧
復有十億菩薩登金剛頂現成正覺

囑累品第八

佛告波斯匿王我誠敕汝吾滅度後八十年八百年
八千年中無佛無法無僧無信男信女時此經三寶
付囑諸國王四部弟子受持讀誦解義爲三界衆生
開空慧道修七賢行十善行化一切衆生後五濁世
比丘比丘尼四部弟子天龍八部一切神王國王大
臣太子王子自恃高貴滅破吾法明作制法制我弟

子比丘比丘尼不聽出家行道亦復不聽造作佛像
形佛塔形立統官制衆安籍記僧比丘地立白衣高
座兵奴爲比丘受別請法知識比丘共爲一心親善
比丘爲作齋會求福如外道法都非吾法當知爾時
正法將滅不久大王壞亂吾道是汝等作自恃威力
制我四部弟子百姓疾病無不苦難是破國因緣說
五濁罪過窮劫不盡大王法末世時有諸比丘四部
弟子國王多作非法之行橫與佛法衆僧作大非法
作諸罪過非法非律繫縛比丘如獄囚法當爾之時
法滅不久大王我滅度後未來世中四部弟子諸小
國王太子王子乃是住持護三寶者轉更滅破三寶
如師子身中蟲自食師子非外道也多壞我佛法得
大罪過正教衰薄民無正行以漸爲惡其壽日減至
于百歲人壞佛教無復孝子六親不和天神不祐疾
疫惡鬼日來侵害灾怪首尾連禍縱橫死入地獄餓
鬼畜生若出爲人兵奴果報如影如響如人夜書火
滅字存三界果報亦復如是大王未來世中一切國
王太子王子四部弟子橫與佛弟子書記制戒如白
衣法如兵奴法若我弟子比丘比丘尼立籍爲官所
使都非我弟子是兵奴法立統官攝僧典王僧籍大

小僧統共相攝縛如獄囚法兵奴之法當爾之時佛法不久大王未來世中諸小國王四部弟子自作此罪破國因緣身自受之非佛法僧大王未來世中流通此經七佛法器十方諸佛常所行道諸惡比丘多求名利於國王太子王子前自說破佛法因緣破國因緣其王不別信聽此語橫作法制不依佛戒是爲破佛破國因緣當爾之時正法不久爾時十六大國王聞佛七誠所說未來世事悲啼涕出聲動三千日月五星二十八宿失光不現時諸王等各各至心受持佛語不制四部弟子出家當如佛教爾時大衆十八梵天王六欲諸天子歎言當爾之時世間空虛是無佛世爾時無量大衆中百億菩薩彌勒師子月等百億舍利弗須菩提等五百億十八梵六欲諸天三界六道阿須輪王聞佛說護佛因緣護國因緣歡喜無量爲佛作禮受持般若波羅蜜

仁王護國般若波羅蜜經卷下

音釋

杻械

杻較九切械下戒也亦云優婆塞此

瘡疣

瘡初莊切瘳也優婆

嗟

云近事男嗟舍何切

蝕

實職切蝕侵虧也

彗星

彗徐醉切彗星

也妖星

雷

雨也礫

亢旱

謂暈陽不雨也辟

鬼辟必歷切除也 睽音閉 罽居例切 縱橫縱將容切縱橫南

佛弟子吳繼勳慕教門之廣大愍末法之衰特助刊贊成茲二卷願
蚤悟一乘深證佛果揚教海之波瀾徧周
界作人天之眼目廣度含靈者
明萬曆壬寅佛成道日徑山寂照庵識

釋喜

實相般若波羅蜜經

唐南天竺沙門菩提流志等奉制譯

如是我聞一時婆伽婆以善成就一切如來金剛正智之所建立種種殊特超於三界灌頂寶冠摩訶瑜伽自在無礙獲深妙智證平等法所作功業皆已究竟隨衆生心悉令滿足三世平等常無動壞三業堅固猶如金剛普光明身住欲界他自在天王宮殿之中其王宮殿種種嚴好皆以大寶摩尼所成繒蓋幢幡衆彩交映珠瓔寶鐸風動成音一切如來常所遊踐咸共歎美吉祥第一有菩薩摩訶薩八千萬人

前後圍繞供養恭敬佛爲說法初中後善其義深遠
其語巧妙純一無雜清淨圓滿其名曰金剛手菩薩
觀自在菩薩虛空藏菩薩文殊師利菩薩轉法輪菩
薩降伏一切魔菩薩如是等菩薩摩訶薩而爲上首
爾時世尊在大衆中爲諸菩薩說一切法自性清淨
實相般若波羅蜜法門所謂愛清淨位是菩薩位見
清淨位是菩薩位深著清淨位是菩薩位悅樂清淨
位是菩薩位藏清淨位是菩薩位莊嚴清淨位是菩
薩位光明清淨位是菩薩位身清淨位是菩薩位語
清淨位是菩薩位意清淨位是菩薩位色清淨位是
菩薩位聲清淨位是菩薩位香清淨位是菩薩位味
清淨位是菩薩位觸清淨位是菩薩位何以故一切
法自性清淨故一切法自性清淨卽般若波羅蜜清
淨爾時世尊說此法門已告金剛手菩薩言金剛手
若有人得聞此一切法自性清淨實相般若波羅蜜
法門一經於耳是人所有煩惱障業障法障極重諸
罪皆自消滅乃至菩提不生惡道若復有人能日日
中受持讀誦思惟修習卽於現身得一切法平等性
金剛三昧餘十六生當於一切法門而得自在遊戲
快樂乃至當復諸佛如來金剛之身爾時如來卽說

呪曰

哈長呼

爾時世尊復以一切如來普光明相爲諸菩薩說一切諸佛寂靜性成正覺實相般若波羅蜜法門所謂金剛平等成正覺大菩提堅固性如金剛故義平等成正覺大菩提一義性故法平等成正覺大菩提自性清淨故一切平等成正覺大菩提離一切分別故爾時世尊說此法門已復告金剛手菩薩言金剛手若有人得聞此四種寂靜性成正覺實相般若波羅蜜法門受持讀誦思惟修習應知是人卽得超於一切惡道疾證阿耨多羅三藐三菩提爾時如來復說

呪曰

唵長呼

爾時世尊復以一切如來能調伏難調衆生釋迦牟尼相爲諸菩薩說一切法平等實相般若波羅蜜法門所謂貪無戲論性瞋無戲論性癡無戲論性何以故一切法無戲論性故一切法無戲論性卽般若波羅蜜無戲論性爾時世尊說此法門已復告金剛手菩薩言金剛手若有人得聞此一切法平等實相般若波羅蜜法門受持讀誦思惟修習假令其人殺害

名

舍利弗文殊師利菩薩

卷八

經

寶目文殊師利菩薩

七

卷八

三界一切衆生終不因斯墮於惡道何以故已受調
伏心儀故當知是人疾得阿耨多羅三藐三菩提
爾時如來復說呪曰

滅

呼長

爾時世尊復以一切如來自性清淨相爲諸菩薩說
一切法平等性觀自在智印實相般若波羅蜜法門
所謂一切世間貪性清淨瞋性清淨一切世間貪性
清淨瞋性清淨故一切世間垢性清淨罪性清淨一
切世間垢性清淨罪性清淨故一切世間法性清淨
衆生性清淨一切世間法性清淨衆生性清淨故一

切世間智性清淨一切世間智性清淨卽般若波羅
蜜清淨爾時世尊說此法門已復告金剛手菩薩言
金剛手若有人得聞此一切法平等觀自在智印實
相般若波羅蜜法門受持讀誦正念修習是人雖在
五欲塵中不爲貪欲諸過所染譬如蓮華雖在淤泥
非泥所著乃至疾得阿耨多羅三藐三菩提爾時如
來復說呪曰

唵唎

呼短

爾時世尊復以一切如來爲三界主相爲諸菩薩說
一切諸佛灌頂出現智藏實相般若波羅蜜法門所

謂灌頂施令一切得三界王位故財寶施令一切得
所願滿足故淨法施令一切得諸法實性故飲食施
令一切身心獲安樂故爾時如來復說呪曰

怛纜

長呼

爾時世尊復以一切如來常住智印祕藏相爲諸菩
薩說一切諸佛金剛智印甚深處實相般若波羅蜜
法門所謂一切諸佛所攝持金剛身印得一切如來
真實體性故一切諸佛所攝持金剛語印得一切法
門自在故一切諸佛所攝持金剛心印得一切三昧
具足故一切諸佛所攝持金剛智印得最上身語心

如金剛故爾時世尊說此法門已復告金剛手菩薩
言金剛手若有人得聞此一切諸佛金剛智印甚深
處實相般若波羅蜜法門受持讀誦正念思惟當知
是人則得成就最上金剛印於一切智及衆事業皆
得圓滿身口意性猶如金剛乃至當成阿耨多羅三
藐三菩提爾時如來復說呪曰

阿

短呼

爾時世尊復以一切如來永離戲論相爲諸菩薩說
文字轉輪品實相般若波羅蜜法門所謂一切諸法
空無自性故一切諸法無相離衆相故一切諸法無

願離諸願故一切諸法自性清淨般若波羅蜜清淨
故爾時如來復說呪曰

阿

呼短

爾時世尊復以一切如來入廣大轉輪相為諸菩薩
說入廣大轉輪實相般若波羅蜜法門所謂入金剛
平等性得入一切如來轉輪故入義平等性得入一
切菩薩轉輪故入法平等性得入妙法轉輪故入一
切平等性得入一切轉輪故爾時如來復說呪曰

嚩

呼長

爾時世尊復以一切如來大善巧方便相為諸菩薩
說最第一廣供養諸佛實相般若波羅蜜法門所謂
發菩提心即為大善巧方便廣供養一切諸佛救護
衆生即為大善巧方便廣供養一切諸佛住持正法
即為大善巧方便廣供養一切諸佛爾時世尊說此
法門已復告金剛手菩薩言金剛手若有人得聞此
最第一廣供養諸佛實相般若波羅蜜法門若自書
若教人書若自受持若教人受持若自讀誦若教人
讀誦若自思惟若教人思惟若自供養若教人供養
隨其所作即為大善巧方便廣供養一切諸佛爾時
如來復說呪曰

唵呼長

爾時世尊復以一切如來能調伏相為諸菩薩說能調能攝一切眾生祕密智藏實相般若波羅蜜法門所謂一切眾生平等性是瞋平等性一切眾生調伏性是瞋調伏性一切眾生真法性是瞋真法性一切眾生金剛性是瞋金剛性何以故一切眾生調伏性即是菩提故爾時如來復說呪曰

荷呼長

爾時世尊復以一切如來住平等相為諸菩薩說一切法最勝平等性實相般若波羅蜜法門所謂一切法平等性故般若波羅蜜平等性一切法第一義性故般若波羅蜜第一義性一切法法性故般若波羅蜜法性一切法業用性故般若波羅蜜業用性爾時如來復說呪曰

頌呼長

爾時世尊復以一切如來為眾生依怙相為諸菩薩說一切眾生依怙實相般若波羅蜜法門所謂一切眾生是如來藏普賢菩薩體性徧故一切眾生是金剛藏金剛藏水所灌灑故一切眾生是正法藏是正言詞所說性故一切眾生是妙業藏善巧妙業所運

爲故爾時如來復說呪曰

底唎

長

爾時世尊復以一切如來無量無邊際究竟盡相爲諸菩薩說一切法無量無邊際究竟盡平等實相般若波羅蜜法門所謂般若波羅蜜無量故一切諸佛亦無量般若波羅蜜無邊故一切諸佛亦無邊般若波羅蜜一性故一切諸法亦一性般若波羅蜜究竟盡故一切諸法亦究竟盡爾時世尊說此法門已復告金剛手菩薩言金剛手若有人得聞此無量無邊際究竟盡實相般若波羅蜜法門受持讀誦正念思

惟此人所有一切障累皆得消滅究竟無餘疾至菩提獲於如來金剛之身而得自在爾時如來復說呪

曰

驃

長

爾時世尊復以一切如來離戲論祕密法性普光明相爲諸菩薩說大安樂金剛不空無礙決定入法性無初中後最第一實相般若波羅蜜法門所謂諸菩薩能廣大承事供養故得最上大安樂得最上大安樂故得諸佛無上大菩提得諸佛無上大菩提故能降伏一切魔軍降伏一切魔軍故得於三界皆自在

於三界皆自在故能徧饒益一切衆生悉與究竟最
上安樂何以故頌曰

有最勝智者 常在生死中 廣度諸羣生

而不入涅槃 般若波羅蜜 究竟方便智

能成清淨業 普淨於諸有 又以於貪等

調伏諸世間 乃至有頂天 清淨無違暴

在於生死世 世法不能染 如蓮華妙色

塵垢所不汙 大欲清淨人 大施安樂人

於三界自在 作堅固利益

爾時世尊說此法門已復告金剛手菩薩言金剛手

若有人得聞此大安樂金剛法性實相般若波羅蜜
法門於日日中每清旦時若聽聞若誦念相續不絕
當知是人所有罪障皆自消滅心常調暢第一安樂
於現身中即得成就金剛不空無礙決定入法復當
成就一切如來金剛祕密堅固之身爾時如來復說
呪曰

苾芻_{呼長}

爾時世尊爲諸菩薩說如上諸法門已復告金剛手
菩薩言金剛手我此經典難可得聞若有得聞乃至
極少至於一字應知是人過去已曾供養諸佛於諸

30 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 22

佛所種諸善根何況有人具足聽聞讀誦之者當知
 是人決定已曾供養恭敬尊重讚歎八十億那由他
 恒河沙等諸佛若是經典所在之處此地則為有諸
 佛塔若復有人愛重此經常隨守護不離身者是人
 應受一切世間恭敬供養是人當得宿命智通能知
 過去無量劫事不為一切天魔波旬之所擾亂四天
 大王及餘諸天常隨衛護一切諸佛及諸菩薩恒共
 攝受十方淨土隨願往生金剛手我今略說實相般
 若波羅蜜法門功德如是若廣說者窮劫不盡佛說
 此經已金剛手等諸菩薩六龍夜叉乾闥婆阿脩羅
 迦樓羅緊那羅摩睺羅伽人非人等一切眾會皆大
 歡喜信受奉行
 實相般若波羅蜜經

音釋

瑜伽 梵語也此云相 繪蓋 蓋以帛為蓋也 鐸 達
 屬 切 哈 胡暗切 唵 烏感切 憾 胡紺切 咭唎 咭許切 恒纜 纜盧各切
 藍 盧監切 頤唎 頤胡切 依怙 怙音戶依倚恃也 驃 毗召切

摩訶般若波羅蜜大明呪經

後秦三藏鳩摩羅什譯

觀世音菩薩行深般若波羅蜜多時照見五陰空度一切苦厄舍利弗色空故無惱壞相受空故無受相想空故無知相行空故無作相識空故無覺相何以故舍利弗非色異空非空異色色卽是空空卽是色受想行識亦復如是舍利弗是諸法空相不生不滅不垢不淨不增不減是空法非過去非未來非現在是故空中無色無受想行識無眼耳鼻舌身意無色聲香味觸法無眼界乃至無意識界無無明亦無無

明盡乃至無老死無老死盡無苦集滅道無智亦無得以無所得故菩薩依般若波羅蜜故心無罣礙無罣礙故無有恐怖離一切顛倒夢想苦惱究竟涅槃三世諸佛依般若波羅蜜故得阿耨多羅三藐三菩提故知般若波羅蜜是大明呪無上明呪無等等明呪能除一切苦真實不虛故說般若波羅蜜呪卽說呪曰

竭帝竭帝

波羅竭帝

波羅僧竭帝

菩提僧莎

訶

摩訶般若波羅蜜大明呪經

經

唐可法寺波羅蜜大明呪經

十二

初八

信官李國章同妻諸氏側室倪氏
母親喻氏長媳王氏次男李大飛
等施刻此經願法界衆生及多生
品者了初居士對吳門徐普書上
元李再禱刻
萬曆癸卯秋八月徑山寂照庵識

大明太祖高皇帝御製般若心經序

二儀久判萬物備周子民者君君育民者法其法也
三綱五常以示天下亦以五刑輔弼之有等凶頑不
循教者往往有趨火赴淵之爲終不自省是凶頑者
非特中國有之盡天下莫不亦然俄西域生佛號曰
釋迦其爲佛也行深願重始終不二於是出世間脫
苦趣其爲教也仁慈忍辱務明心以立命執此道而
爲之意在人皆若此利濟羣生今時之人罔知佛之
所以每云法空虛而不實何以導君子訓小人以朕
言之則不然佛之教實而不虛正欲去愚迷之虛立

撰述
卷之八
本性之實特挺身苦行外其教而異其名脫苦有情
昔佛在時侍從聽從者皆聰明之士演說者乃三綱
五常之性理也既聞之後人各獲福自佛入滅之後
其法流入中國間有聰明者動演人天小果猶能化
凶頑爲善何況聰明者知大乘而識宗旨者乎如心
經每言空不言實所言之空乃相空耳除空之外所
存者本性也所以相空有六謂口空說相眼空色相
耳空聽相鼻空嗅相舌空味相身空樂相其六空之
相又非真相之空乃妄想之相爲之空相是空相愚
及世人禍及今古往往愈墮彌深不知其幾斯空相

前代帝王被所惑而幾喪天下者周之穆王漢之武
帝唐之玄宗蕭梁武帝元魏主燾李後主宋徽宗此
數帝廢國怠政惟蕭梁武帝宋之徽宗以及殺身皆
由妄想飛升及入佛天之地其佛天之地未嘗渺茫
此等快樂世嘗有之爲人性貪而不覺而又取其樂
人世有之者何且佛天之地如爲國君及王侯者若
不作非爲善能保守此境非佛天者何如不能保守
而僞爲用妄想之心卽入空虛之境故有如是斯空
相富者被纏則姪欲竝生喪富矣貧者被纏則諸詐
竝作殞身矣其將賢未賢之人被纏則非仁人君子

撰述
卷之八終
其僧道被纏則不能立本性而見宗旨者也所以
本經題云心經者正欲去心之邪念以歸正道豈佛
教之妄耶朕特述此使聰明者觀二儀之覆載日月
之循環虛實之孰取保命者何如若取有道保有方
豈不佛法之良哉色空之妙乎

般若波羅蜜多心經序

唐釋慧忠撰

夫灑性無邊豈藉心之所度真如非相詎假言之所
詮是故眾生浩浩無窮灑海茫茫何極若也廣尋文
義猶如鏡裏求形更乃息念觀空又侶日中逃影茲
經喻如大地何物不從地之所生諸佛唯指一心何
法不因心之所立但了心地故號總持悟法無生名
爲妙覺一念超越豈在繁論者爾

般若波羅蜜多心經

唐三藏法師玄奘奉詔譯

觀自在菩薩行深般若波羅蜜多時照見五蘊皆空
度一切苦厄舍利子色不異空空不異色色卽是空
空卽是色受想行識亦復如是舍利子是諸法空相
不生不滅不垢不淨不增不減是故空中無色無受
想行識無眼耳鼻舌身意無色聲香味觸法無眼界
乃至無意識界無無明亦無無明盡乃至無老死亦
無老死盡無苦集滅道無智亦無得以無所得故苦
提薩埵依般若波羅蜜多故心無罣礙無罣礙故無
有恐怖遠離顛倒夢想究竟涅槃三世諸佛依般若
波羅蜜多故得阿耨多羅三藐三菩提故知般若波
羅蜜多是大神呪是大明呪是無上呪是無等等呪
能除一切苦真實不虛故說般若波羅蜜多呪卽說

呪曰

揭諦揭諦

波羅揭諦

波羅僧揭諦

菩提薩婆

訶

般若波羅蜜多心經

終

德清辭信士周美施刻此卷
見江沙浦可震對姑蘇徐普書溧水端學堯刻
萬曆辛丑冬十二月徑山寂照庵識

文殊師利所說摩訶般若波羅蜜經

梁扶南三藏曼陀羅僊譯

如是我聞一時佛在舍衛國祇樹給孤獨園與大比丘僧滿足千人菩薩摩訶薩十千人俱以大莊嚴而自莊嚴皆悉已住不退轉地其名曰彌勒菩薩文殊師利菩薩無礙辯菩薩不捨擔菩薩與如是等大菩薩俱文殊師利童真菩薩摩訶薩明相現時從其住處來詣佛所在外而立爾時尊者舍利弗富樓那彌多羅尼子大目乾連摩訶迦葉摩訶迦旃延摩訶拘絺羅如是等諸大聲聞各從住處俱詣佛所在外而

立佛知衆會皆悉集已爾時如來從任處出敷座而坐告舍利弗汝今何故於晨朝時在門外立舍利弗白佛言世尊文殊師利童真菩薩先已至此任門外立我實於後晚來到耳爾時世尊問文殊師利汝實先來到此任處欲見如來耶文殊師利卽白佛言如是世尊我實來此欲見如來何以故我樂正觀利益衆生我觀如來如相不異相不動相不作相無生相無滅相不有相不無相不在方不離方非三世非不三世非二相非不二相非垢相非淨相以如是等正觀如來利益衆生佛告文殊師利若能如是見於如來心無所取亦無不取非積聚非不積聚爾時舍利弗語文殊師利言若能如汝所說見如來者甚爲希有爲一切衆生故見於如來而心不取衆生之相化一切衆生向於涅槃而亦不取向涅槃相爲一切衆生發大莊嚴而心不見莊嚴之相爾時文殊師利童真菩薩摩訶薩語舍利弗言如是如是如汝所說雖爲一切衆生發大莊嚴心恒不見有衆生相爲一切衆生發大莊嚴而衆生界亦不增不減假使一佛住世若一劫若過一劫如此一佛世界復有無量無邊恒河沙諸佛如是一一佛若一劫若過一劫晝夜

說法心不暫息各各度於無量恒河沙衆生皆入涅槃而衆生界亦不增不減乃至十方諸佛世界亦復如是一一諸佛說法教化各度無量恒河沙衆生皆入涅槃於衆生界亦不增不減何以故衆生定相不可得故是故衆生界不增不減舍利弗復語文殊師利言若衆生界不增不減何故菩薩爲諸衆生求阿耨多羅三藐三菩提常行說法文殊師利白佛言若諸衆生悉空相者亦無菩薩求阿耨多羅三藐三菩提亦無衆生而爲說法何以故我說法中無有一法當可得故爾時佛告文殊師利若無衆生云何說有衆生及衆生界文殊師利言衆生界相如諸佛界又問衆生界者是有量耶答曰衆生界量如佛界量又問衆生界量有處所不答曰衆生界量不可思議又問衆生界相爲有住不答曰衆生無住猶如空住佛告文殊師利如是修般若波羅蜜時當云何住般若波羅蜜文殊師利言以不住法爲住般若波羅蜜佛復問文殊師利言云何不住法名住般若波羅蜜文殊師利言以無住相卽住般若波羅蜜佛復告文殊師利如是住般若波羅蜜時是諸善根云何增長云何損減文殊師利言若能如是住般若波羅蜜於諸

善根無增無減於一切法亦無增無減是般若波羅蜜性相亦無增無減世尊如是修般若波羅蜜則不捨凡夫法亦不取賢聖法何以故般若波羅蜜不見樂生死可厭何以故不見生死況復厭離不見涅槃可樂生死可厭何以故不見生死況復厭離不見涅槃見功德可取於一切法心不增減何以故不見法界有增減故世尊若能如是是名修般若波羅蜜世尊不見諸法有生有滅是修般若波羅蜜世尊不見諸法有增有減是修般若波羅蜜世尊心無希取不見法相有可求者是修般若波羅蜜世尊不見好醜不生高下不作取捨何以故法無好醜離諸相故法無高下等法性故法無取捨住實際故是修般若波羅蜜佛告文殊師利是諸佛法得不勝乎文殊師利言我不見諸法有勝如相如來自覺一切法空是可證知佛告文殊師利如是如是如來正覺自證空法文殊師利白佛言世尊是空法中當有勝如而可得耶佛言善哉善哉文殊師利如汝所說是真法乎佛復謂文殊師利言阿耨多羅是佛法不文殊師利言如佛所說阿耨多羅是名佛法何以故無法可得名阿

楞多羅文殊師利言如是修般若波羅蜜不名法器
非化凡夫法亦非佛法非增長法是修般若波羅蜜
復次世尊修般若波羅蜜時不見有法可分別思惟
佛告文殊師利汝於佛法不思惟耶文殊師利言不
也世尊如我思惟不見佛法亦不可分別是凡夫法
是聲聞法是辟支佛法如是名爲無上佛法復次修
般若波羅蜜時不見凡夫相不見佛法相不見諸法
有決定相是爲修般若波羅蜜復次修般若波羅蜜
時不見欲界不見色界不見無色界不見寂滅界何
以故不見有法是滅盡相是修般若波羅蜜復次修

般若波羅蜜時不見作恩者不見報恩者思惟二相
心無分別是修般若波羅蜜復次修般若波羅蜜時
不見是佛法可取不見是凡夫法可捨是修般若波
羅蜜復次修般若波羅蜜時不見凡夫法可滅亦不
見佛法而心證知是修般若波羅蜜佛告文殊師利
善哉善哉汝能如是善說甚深般若波羅蜜相是諸
菩薩摩訶薩所學法印乃至聲聞緣覺學無學人亦
當不離是印而修道果佛告文殊師利若人得聞是
法不驚不畏者不從千佛所種諸善根乃至百千萬
億佛所久植德本乃能於是甚深般若波羅蜜不驚

不怖文殊師利白佛言世尊我今更說般若波羅蜜
義佛言便說世尊修般若波羅蜜時不見法是應住
是不應住亦不見境界可取捨相何以故如諸如來
不見一切法境界相故乃至不見諸佛境界況取聲
聞緣覺凡夫境界不取思議相亦不取不思議相不
見諸法有若干相自證空法不可思議如是菩薩摩
訶薩皆已供養無量百千萬億諸佛種諸善根乃能
於是甚深般若波羅蜜不驚不怖復次修般若波羅
蜜時不見縛不見解而於凡夫乃至三乘不見差別
相是修般若波羅蜜佛告文殊師利汝已供養幾所

諸佛文殊師利言我及諸佛如幻化相不見供養及
與受者佛告文殊師利汝今可不住佛乘耶文殊師
利言如我思惟不見一法云何當得住於佛乘佛言
文殊師利汝不得佛乘乎文殊師利言如佛乘者但
有名字非可得亦不可見我云何得佛言文殊師利
汝得無礙智乎文殊師利言我卽無礙云何以無礙
而得無礙佛言汝坐道場乎文殊師利言一切如來
不坐道場我今云何獨坐道場何以故現見諸法住
實際故佛言云何名實際文殊師利言身見等是實
際佛言云何身見是實際文殊師利言身見如相非

實非不實不來不去亦身非身是名實際舍利弗白
佛言世尊若於斯義諦了決定是名菩薩摩訶薩何
以故能聞如是甚深般若波羅蜜相心不驚不怖不
沒不悔彌勒菩薩白佛言世尊得聞如是般若波羅
蜜具足法相是卽近於佛坐何以故如來現覺此法
相故文殊師利白佛言世尊得聞甚深般若波羅蜜
能不驚不怖不沒不悔當知此人卽是見佛爾時復
有無相優婆夷白佛言世尊凡夫法聲聞法辟支佛
法菩薩法佛法是諸法皆無相是故於所從聞般若
波羅蜜皆不驚不怖不沒不悔何以故一切諸法本

無相故佛告舍利弗善男子善女人若聞如是甚深
般若波羅蜜心得決定不驚不怖不沒不悔當知是
人卽住不退轉地若人聞是甚深般若波羅蜜不驚
不怖不沒不悔信樂聽受歡喜不厭是卽具足檀波
羅蜜尸羅波羅蜜羼提波羅蜜毗梨耶波羅蜜禪波
羅蜜般若波羅蜜亦能爲他顯示分別如說修行佛
告文殊師利汝觀何義爲得阿耨多羅三藐三菩提
住阿耨多羅三藐三菩提文殊師利言我無得阿耨
多羅三藐三菩提我不住佛乘云何當得阿耨多羅
三藐三菩提如我所說卽菩提相佛讚文殊師利言

善哉善哉汝能於是甚深法中巧說斯義汝於先佛
久種善根以無相法淨修梵行文殊師利言若見有
相則言無相我今不見有相亦不見無相云何而言
以無相法淨修梵行佛告文殊師利汝見聲聞戒耶
答曰見佛言汝云何見文殊師利言我不作凡夫見
不作聖人見不作學見不作無學見不作大見不作
小見不作調伏見不作不調伏見非見非不見舍利
弗語文殊師利言汝今如是觀聲聞乘若觀佛乘當
復云何文殊師利言不見菩薩法不見修行菩提及
證菩提者舍利弗語文殊師利言云何名佛云何觀

佛文殊師利言云何爲我舍利弗言我者但有名字
名字相空文殊師利言如是如是如我但有名字佛
亦但有名字名字相空卽是菩提不以名字而求菩
提菩提之相無言無說何以故言說菩提二俱空故
復次舍利弗汝問云何名佛云何觀佛者不生不滅
不來不去非名非相是名爲佛如自觀身實相觀佛
亦然唯有智者乃能知耳是名觀佛爾時舍利弗白
佛言世尊如文殊師利所說般若波羅蜜非初學菩
薩所能了知文殊師利言非但初學菩薩所不能知
及諸二乘所作已辦者亦未能了如是說法無能知

者何以故菩提之相實無有法而可知故無見無聞
無得無念無生無滅無說無聽如是菩提性相空寂
無證無知無形無相云何當有得菩提者舍利弗語
文殊師利言佛於法界不證阿耨多羅三藐三菩提
耶文殊師利言不也舍利弗何以故世尊卽是法界
若以法界證法界者卽是諍論舍利弗法界之相卽
是菩提何以故是法界中無衆生相一切法空故一
切法空卽是菩提無二無分別故舍利弗無分別中
則無知者若無知者卽無言說無言說相卽非有非
無非知非不知一切諸法亦復如是何以故一切諸

法不見處所決定性故如逆罪相不可思議何以故
諸法實相不可壞故如是逆罪亦無本性不生天上
不墮地獄亦不入涅槃何以故一切業緣皆住實際
不來不去非因非果何以故法界無邊無前無後故
是故舍利弗若見犯重比丘不墮地獄清淨行者不
入涅槃如是比丘非應供非不應供非盡漏非不盡
漏何以故於諸法中住平等故舍利弗言云何名不
退法忍文殊師利言不見少法有生滅相名不退法
忍舍利弗言云何復名不調比丘文殊師利言漏盡
阿羅漢是名不調何以故諸結已盡更無所調故名

不調若過心行名爲凡夫何以故凡夫衆生不順法界是故名過舍利弗言善哉善哉汝今爲我善解漏盡阿羅漢義文殊師利言如是如是我卽漏盡眞阿羅漢何以故斷求聲聞欲及辟支佛欲以是因緣故名漏盡得阿羅漢佛告文殊師利諸菩薩等坐道場時覺悟阿耨多羅三藐三菩提不文殊師利言菩薩坐於道場無有覺悟阿耨多羅三藐三菩提何以故如菩提相無有少法而可得者名阿耨多羅三藐三菩提無相菩提誰能坐者亦無起者以是因緣不見菩薩坐於道場亦不覺證阿耨多羅三藐三菩提三菩提文

殊師利白佛言世尊菩提卽五逆五逆卽菩提何以故菩提五逆無二相故無覺無覺者無見無見者無知無知者無分別無分別者如是之相名爲菩提見五逆相亦復如是若言見有菩提而取證者當知此輩卽是增上慢人爾時世尊告文殊師利汝言我是如來亦謂我爲如來乎文殊師利言不也世尊我不謂如來爲如來耶無有如相可名爲如亦無如來智能知於如何以故如來及智無二相故空爲如來但有名字我當云何謂是如來佛告文殊師利汝疑如來耶文殊師利言不也世尊我觀如來無決定性無

2001234567892101234567892101234567892

文殊師利

文殊師利不思議相不可思議佛語

十一

善男子

生無滅故無所疑佛告文殊師利汝今不謂如來出現於世耶文殊師利言若有如來出現世者一切法界亦應出現佛告文殊師利汝謂恒沙諸佛入涅槃耶文殊師利言諸佛一相不可思議佛語文殊師利如是如是佛是一相不思議相文殊師利白佛言世尊佛今住世耶佛語文殊師利如是如是文殊師利言若佛住世恒沙諸佛亦應住世何以故一切諸佛皆同一相不思議相不思議相者無生無滅若未來諸佛出與於世一切諸佛亦皆出世何以故不思議中無過去未來現在相但衆生取著謂有出世謂佛

滅度佛告文殊師利此是如來阿羅漢阿惟越致菩薩所解何以故是三種人聞甚深法能不誹謗亦不讚歎文殊師利白佛言世尊如是不思議誰當誹謗誰當讚歎佛言文殊師利如來不思議凡夫亦不思議文殊師利白佛言世尊凡夫亦不思議耶佛言亦不思議何以故一切心相皆不思議文殊師利言若如是說如來不思議凡夫亦不思議今無數諸佛求於涅槃徒自疲勞何以故不思議法即是涅槃等無異故文殊師利言如是凡夫不思議諸佛不思議若善男子善女人久習善根近善知識乃能了知佛告

經五

文殊師利不思議相不可思議佛語

十一

羽九

文殊師利汝欲使如來於衆生中爲最勝耶文殊師利言我欲使如來於諸衆生爲最第一但衆生相亦不可得佛言汝欲使如來得不思議法耶文殊師利言欲使如來得不思議法而於諸法無成就者佛告文殊師利欲使如來說法教化耶文殊師利白佛言欲使如來說法教化而是說及聽者皆不可得何以故住法界故法界衆生無差別相佛告文殊師利汝欲使如來爲無上福田耶文殊師利言如來是無盡福田是無盡相無盡相卽無上福田非福田非不福田是名福田無有明闇生滅等相是名福田若能如

是解福田相深植善種亦無增無減佛告文殊師利云何植種不增不減文殊師利言福田之相不可思議若人於中如法修善亦不可思議如是植種名無增無減亦是無上最勝福田爾時大地以佛神力六種震動現無常相一萬六千人皆得無生法忍七百亿丘三千優婆塞四萬優婆夷六十億那由他六欲諸天遠塵離垢於諸法中得法眼淨爾時阿難從座而起徧袒右肩右膝著地白佛言世尊何因緣故如是大地六種震動佛告阿難我說福田無差別相故現斯瑞往昔諸佛亦於此處作如是說福田之相利

益衆生十方世界六種震動舍利弗白佛言世尊文殊師利是不可思議何以故所說法相不可思議佛告文殊師利如是如是如舍利弗言汝之所說實不思議文殊師利白佛言世尊不思議不可說思議亦不可說如是思議不思議性俱不可說一切聲相非可思議亦非不可思議佛言汝入不思議三昧耶文殊師利言不也世尊我卽不思議不見有心能思議者云何而言入不思議三昧我初發心欲入是定而今思惟實無心相而入三昧如人學射久習則巧後雖無心以久習故箭發皆中我亦如是初學不思議

三昧繫心一緣若久習成就更無心想恒與定俱舍利弗語文殊師利言更有勝妙寂滅定不文殊師利言若有不思議定者汝可問言更有寂滅定不如我意解不可思議定尚不可得云何問有寂滅定乎舍利弗言不思議定不可得耶文殊師利言思議定者是可得相不可思議定者不可得相一切衆生實成就不可思議定何以故一切心相卽非心故是名不思議定是故一切衆生相及不思議三昧相等無分別佛讚文殊師利言善哉善哉汝於諸佛久植善根淨修梵行乃能演說甚深三昧汝今安住如是般若波

羅蜜中文殊師利言若我住般若波羅蜜中能作是說卽是有想便住我想若住有想我想中者般若波羅蜜便有處所般若波羅蜜若住於無亦是我亦名處所離此二處住無所住如諸佛住安處寂滅非思議境界如是不思議名般若波羅蜜住處般若波羅蜜處一切法無相一切法無作般若波羅蜜卽不思議不思議卽法界法界卽無相無_二卽不思議不思議卽般若波羅蜜般若波羅蜜法界無_二無別無_二無別卽法界法界卽無相無相卽般若波羅蜜般若波羅蜜界卽不思議界卽不思議界卽無生無滅

界無生無滅界卽不思議界文殊師利言如來界及我界卽不二相如是修般若波羅蜜者則不求菩提何以故菩提相離卽般若波羅蜜故世尊若知我相而不可著無知無著是佛所知不可思議無知無著卽佛所知何以故知體本性無所有相云何能轉法界若知本性無體無著者卽名無物若無有物是無處所無依無住無依無住卽無生無滅無生無滅卽是有爲無爲功德若如是知則無心想無心想者云何當知有爲無爲功德無知卽不思議不思議者是佛所知亦無取無不取不見三世去來等相不取生

滅及諸起作亦不斷不常如是知者是名正智不思
議智如虛空無此無彼不可比類無好惡無等等無
相無貌佛告文殊師利若如是知名不退智文殊師
利言無作智名不退智猶如金鑽先加槌打方知好
惡若不槌打無能知者不退智相亦復如是要行境
界不念不著無起無作具足不動不生不滅爾乃顯
現爾時佛告文殊師利言如諸如來自說已智誰當
能信文殊師利言如是智者非涅槃法非生死法是
寂滅行是無動行不斷貪欲瞋恚愚癡亦非不斷何
以故無盡無滅不離生死亦非不離不修道非不修

道作是解者名爲正信佛告文殊師利言善哉善哉
如汝所說深解斯義爾時摩訶迦葉白佛言世尊於
當來世若說如是甚深正法誰能信解如聞受行佛
告迦葉今此會中比丘比丘尼優婆塞優婆夷得聞
此經者如是人等於未來世若聞是法必能信解於
甚深般若波羅蜜乃能讀誦信解受持亦爲他人分
別演說譬如長者失摩尼寶憂愁苦惱後若還得心
甚歡喜如是迦葉比丘比丘尼優婆塞優婆夷等亦
復如是有信樂心若不聞法則生苦惱若得聞時信
解受持常樂讀誦甚大歡喜當知此人卽是見佛亦

卽親近供養諸佛佛告迦葉譬如忉利天上波利質
多羅樹炮初出時是中諸天見是樹已皆大歡喜此
樹不久必當開敷若比丘比丘尼優婆塞優婆夷得
聞般若波羅蜜能生信解亦復如是此人不久亦當
開敷一切佛法於當來世有比丘比丘尼優婆塞優
婆夷聞般若波羅蜜信受讀誦心不悔沒當知是人
已從此會聽受是經亦能爲人聚落城邑廣說流布
當知是人佛所護念如是甚深般若波羅蜜中有能
信樂無疑惑者是善男子善女人於過去諸佛久已
修學植諸善根譬如有人以手穿珠忽遇無上真摩

尼寶心大歡喜當知是人必已曾見如是迦葉若善
男子善女人修學餘法忽然得聞甚深般若波羅蜜
能生歡喜亦復如是當知此人已曾聞故若有衆生
得聞甚深般若波羅蜜心能信受生大歡喜如是人
等亦曾親近無數諸佛從聞般若波羅蜜已修學故
譬如有人先所經見城邑聚落後若聞人讚歎彼城
所有園苑種種池泉華果林樹男女人民皆可愛樂
是人聞已卽大歡喜更勸令說是城園苑衆好嚴飾
雜華池泉多諸甘果種種珍妙一切愛樂是人得聞
重甚歡喜如是之人皆曾見故若善男子善女人有

聞般若波羅蜜信心聽受能生歡喜樂聞不厭而更
勸說當知此輩已從文殊師利曾聞如是般若波羅
蜜故迦葉白佛言世尊若將來世善男子善女人得
聞是甚深般若波羅蜜信樂聽受以是相故當知此
人亦於過去佛所曾聞修學文殊師利白佛言世尊
佛說諸法無作無相第一寂滅若善男子善女人有
能如是諦了斯義如聞而說爲諸如來之所讚歎不
違法相是卽佛說亦是熾然般若波羅蜜相亦名熾
然具足佛法通達實相不可思議佛告文殊師利我
本行菩薩道時修諸善根欲住阿惟越致地當學般

若波羅蜜欲成阿耨多羅三藐三菩提當學般若波
羅蜜若善男子善女人欲解一切法相欲知一切衆
生心界皆悉同等當學般若波羅蜜文殊師利欲學
一切佛法具足無礙當學般若波羅蜜欲學一切佛
成阿耨多羅三藐三菩提時相好威儀無量法式當
學般若波羅蜜欲知一切佛得成阿耨多羅三藐三
菩提一切法式及諸威儀當學般若波羅蜜何以故
是空法中不見諸佛菩提等故若善男子善女人欲
知如是等相無疑惑者當學般若波羅蜜何以故般
若波羅蜜不見諸法若生若滅若垢若淨是故善男

子善女人應作如是學般若波羅蜜欲知一切法無過去未來現在等相當學般若波羅蜜何以故法界性相無去來現在故欲知一切法同入法界心無罣礙當學般若波羅蜜欲得三轉十二行法輪亦自證知而不取著當學般若波羅蜜欲得慈心徧覆一切衆生而無限齊亦不作念有衆生相當學般若波羅蜜欲得於一切衆生不起諍論亦復不取無諍論相當學般若波羅蜜欲知是處非處十力無畏住佛智慧得無礙辯當學般若波羅蜜爾時文殊師利白佛言世尊我觀正法無爲無相無得無利無生無滅無

來無去無知者無見者無作者不見般若波羅蜜亦不見般若波羅蜜境界非證非不證不作戲論無有分別一切法無盡離盡無凡夫法無聲聞法無辟支佛法佛法非得非不得不捨生死不證涅槃非思議非不思議非作非不作法相如是不知云何當學般若波羅蜜爾時佛告文殊師利若能如是知諸法相是名學般若波羅蜜菩薩摩訶薩若欲學菩提自在三昧得是三昧已照明一切甚深佛法及知一切諸佛名字亦悉了達諸佛世界無有障礙當如文殊師利所說般若波羅蜜中學文殊師利白佛言世尊何

故名般若波羅蜜佛言般若波羅蜜無邊無際無名無相非思量無歸依無洲渚無犯福無悔無明如法界無有分齊亦無限數是名般若波羅蜜亦名菩薩摩訶薩行處非行非不行處悉入一乘名非行處何以故無念無作故文殊師利白佛言世尊當云何行能速得阿耨多羅三藐三菩提佛言文殊師利如般若波羅蜜所說行能速得阿耨多羅三藐三菩提復有一行三昧若善男子善女人修是三昧者亦速得阿耨多羅三藐三菩提文殊師利言世尊云何名一行三昧佛言法界一相繫緣法界是名一行三昧若善男子善女人欲入一行三昧當先聞般若波羅蜜如說修學然後能入一行三昧如法界緣不退不壞不思議無礙無相善男子善女人欲入一行三昧應處空閑捨諸亂意不取相貌繫心一佛專稱名字隨佛方所端身正向能於一佛念念相續卽是念中能見過去未來現在諸佛何以故念一佛功德無量無邊亦與無量諸佛功德無二不思議佛法等無分別皆乘一如成最正覺悉具無量功德無量辯才如是入一行三昧者盡知恒沙諸佛法界無差別相阿難所聞佛法得念總持辯才智慧於聲聞中雖爲最

勝猶住量數則有限礙若得一行三昧諸經法門一
一分別皆悉了知決定無礙晝夜常說智慧辯才終
不斷絕若比阿難多聞辯才百千等分不及其一菩
薩摩訶薩應作是念我當云何逮得一行三昧不可
思議功德無量名稱佛言菩薩摩訶薩當念一行三
昧常勤精進而不懈怠如是次第漸漸修學則能得
入一行三昧不可思議功德作證除謗正法不信惡
業重罪障者所不能入復次文殊師利譬如有人得
摩尼珠示其珠師珠師答言此は無價真摩尼寶卽
求師言爲我治磨勿失光色珠師治已隨其磨時珠

色光明映徹表裏文殊師利若有善男子善女人修
學一行三昧不可思議功德無量名稱隨修學時知
諸法相明達無礙功德增長亦復如是文殊師利譬
如日輪光明徧滿無有減相若得一行三昧悉能具
足一切功德無有缺少亦復如是照明佛法如日輪
光文殊師利我所說法皆是一味離味解脫味寂滅
味若善男子善女人得是一行三昧者其所演說亦
是一味離味解脫味寂滅味隨順正法無錯謬相文
殊師利若菩薩摩訶薩得是一行三昧皆悉滿足助
道之法速得阿耨多羅三藐三菩提復次文殊師利

菩薩摩訶薩不見法界有分別相及以一相速得阿耨多羅三藐三菩提相不可思議是菩提中亦無得佛如是知者速得阿耨多羅三藐三菩提若信一切法悉是佛法不生驚怖亦不疑惑如是忍者速得阿耨多羅三藐三菩提文殊師利白佛言世尊以如是因速得阿耨多羅三藐三菩提耶佛言得阿耨多羅三藐三菩提不以因得不以非因得何以故不思議界不以因得不以非因得若善男子善女人聞如是說不生懈怠當知是人以於先佛種種善根是故比丘比丘尼聞說是甚深般若波羅蜜不生驚怖卽是從佛出家若優婆塞優婆夷得聞如是甚深般若波羅蜜心不驚怖卽是成就真歸依處文殊師利若善男子善女人不習甚深般若波羅蜜卽是不修佛乘譬如大地一切藥木皆依地生長文殊師利菩薩摩訶薩亦復如是一切善根皆依般若波羅蜜而得增長於阿耨多羅三藐三菩提不相違背爾時文殊師利白佛言世尊此閻浮提城邑聚落當於何處演說如是甚深般若波羅蜜佛告文殊師利今此會中若有人聞般若波羅蜜皆發誓言於未來世常得與般若波羅蜜相應從是信解未來世中能聽是經當知

此人不從餘小善根中來所能堪受聞已歡喜文殊師利若復有人從汝聽是般若波羅蜜應作是言此般若波羅蜜中無聲聞法辟支佛法菩薩法佛法亦無凡夫生滅等法文殊師利白佛言世尊若比丘比丘尼優婆塞優婆夷來問我言云何如來說般若波羅蜜我當答言一切諸法無諍論相云何如來當說般若波羅蜜何以故不見有法可與諍論亦無衆生心識能知復次世尊我當更說究竟實際何以故一切法相同入實際阿羅漢無別勝法何以故阿羅漢法凡夫法不一不異故復次世尊如是說法無有衆

生已得涅槃今得當得何以故無有決定衆生相故文殊師利言若人欲聞般若波羅蜜我當作如是說其有聽者不念不著無聞無得當如幻人無所分別如是說者是真說法是故聽者莫作二相不捨諸見而修佛法不取佛法不捨凡夫法何以故佛及凡夫二法相空無取捨故若人問我當作是說如是安慰如是建立善男子善女人應如是問作如是任心不退沒當如法相隨願般若波羅蜜說爾時世尊歎文殊師利言善哉善哉如汝所說若善男子善女人欲見諸佛應學如是般若波羅蜜欲親近諸佛如法供

養應學如是般若波羅蜜若欲言如來是我世尊應
學如是般若波羅蜜若欲言如來非我世尊亦應學
如是般若波羅蜜若欲成阿耨多羅三藐三菩提應
學如是般若波羅蜜若欲不成阿耨多羅三藐三菩
提亦應學如是般若波羅蜜若欲成就一切三昧應
學如是般若波羅蜜若欲不成一切三昧亦應學
如是般若波羅蜜何以故無作三昧無異相故一切
法無生無出故若欲知一切法假名應學如是般若
波羅蜜若欲知一切衆生修菩提道不來菩提相心
不退沒應學如是般若波羅蜜何以故一切法皆菩

提相故若欲知一切衆生行非行相非行即菩提菩
提即法界法界即實際心不退沒應學如是般若波
羅蜜若欲知一切如來神通變化無相無礙亦無方
所應學如是般若波羅蜜佛告文殊師利若比丘比
丘尼優婆塞優婆夷欲得不墮惡趣當學般若波羅
蜜一四句偈受持讀誦爲他解說隨順實相如是善
男子善女人當知決定得阿耨多羅三藐三菩提則
住佛國若聞如是般若波羅蜜不驚不畏心生信解
當知此輩佛所印可是佛所行大乘法印若善男子
善女人學此法印超過惡趣不入聲聞辟支佛道以

超過故爾時帝釋三十三天以天妙華優鉢羅華拘
物頭華分陀利華天曼陀羅華等天梅檀香及餘末
香種種金寶作天妓樂爲供養般若波羅蜜并諸如
來及文殊師利以散其上作是供養已願我常聞般
若波羅蜜法印釋提桓因復作是願願閻浮提善男
子善女人常使得聞是經決定佛法皆令信解受持
讀誦爲人演說一切諸天爲作擁護爾時佛告釋提
桓因言憍尸迦如是如是善男子善女人當得決定
諸佛菩提文殊師利白佛言世尊如是受持善男子
善女人得大利益功德無量爾時以佛神力一切大

地六反震動佛時微笑放大光明徧照三千大千世
界文殊師利白佛言世尊卽是如來印般若波羅蜜
相佛言文殊師利如是如是說般若波羅蜜已皆現
此瑞爲印般若波羅蜜故使人受持令無讚毀何以
故無相法印不可讚毀我今以是法印令諸天魔不
能得便佛說是已爾時諸大菩薩及四部眾聞說般
若波羅蜜皆大歡喜信受奉行

文殊師利所說摩訶般若波羅蜜經

音釋

摩訶拘絺羅

梵語也此云大膝因膝骨麤大故名絺羅音癡

羼提

梵語也此云忍

屏彝初限鑛古猛切金鐵
 初潤二切鑛之璞曰鑛
 涖藥炮如瘡炮也
 涖掌與切涖水也
 涖居曰涖小涖曰涖
 州涖

丹陽居士賀學易施資刻此
 文殊師利所說般若波羅蜜經
 計字九
 四百一十
 該銀五兩一錢七分
 吳江居士了心對吳門徐普書江寧羅仕貴刻
 對吳門徐普書江寧羅仕貴刻

文殊師利所說般若波羅蜜經

梁扶南三藏僧伽婆羅譯

如是我聞一時佛在舍衛國祇樹給孤獨園與大比丘衆一萬人俱及諸菩薩摩訶薩十萬人俱皆悉住於不退轉地久已供養無量諸佛於諸佛所深種善根成就衆生淨佛國土得陀羅尼獲樂說辯成就智慧具足功德以自在神通遊諸佛世界放無量光明說無盡妙法教諸菩薩入一相門得無所畏善降衆魔教化度脫外道邪見若有衆生樂聲聞者說聲聞乘樂緣覺者說緣覺乘樂世間者說世間乘以布施

持戒忍辱精進禪定智慧攝諸衆生未度者度未脫
者脫未安者安未泥洹者令得泥洹究竟菩薩所行
善入諸佛法藏如是種種功德皆悉具足其名曰文
殊師利法王子菩薩彌勒菩薩普光明菩薩不捨勇
猛精進菩薩藥王菩薩寶掌菩薩寶印菩薩月光菩
薩日淨菩薩大力菩薩無量力菩薩得勤精進菩薩
力幢相菩薩法相菩薩自在王菩薩如是等菩薩摩
訶薩十萬人俱并餘天龍鬼神等一切大衆皆悉來
集爾時世尊於中夜時放大光明青黃赤白雜玻瓈
色普照十方無量世界一切衆生觸此光者皆從臥

起見此光明皆得法喜成生疑惑此光何來普徧世
界令諸衆生得安隱樂作是念已於一一光復出大
光明照耀殊特勝於前光如是展轉乃至十重一切
菩薩及諸比丘比丘尼優婆塞優婆夷天龍夜叉乾
闥婆阿脩羅迦樓羅緊那羅摩睺羅伽人非人等咸
皆踊躍得未曾有各各思念必是如來放此光明我
等應當疾至佛所禮拜親近恭敬如來是時文殊師
利及諸菩薩摩訶薩衆遇此光者歡喜踊躍克徧身
心各從住處到祇洹門爾時舍利弗大目犍連富樓
那彌多羅尼子摩訶迦葉摩訶迦旃延摩訶俱絺羅

皆從住處到祇洹門帝釋四天王上至阿迦尼吒天亦觀光明歎未曾有與其眷屬齋妙天華天香天樂天寶衣一切皆悉到祇洹門其餘比丘比丘尼優婆塞優婆夷天龍八部遇光歡喜皆來到門爾時世尊一切種智知諸大衆悉已在門從住處起出至門外自鋪法座結跏趺坐告舍利弗汝今晨朝來門外乎舍利弗白佛言世尊文殊師利等菩薩摩訶薩皆悉先至爾時世尊告文殊師利汝於晨朝先至門乎文殊師利白佛言如是世尊我於中夜見大光明十重照耀得未曾有心懷歡喜踊躍無量故來禮拜親近

如來并欲願聞甘露妙法爾時世尊告文殊師利汝今真實見如來乎文殊師利白佛言世尊如來法身本不可見我爲衆生故來見佛佛法身者不可思議無相無形不來不去非有非無非見非不見如如實際不去不來非無非有非處非非處非一非二非淨非垢不生不滅我見如來亦復如是佛告文殊師利汝今如是見如來乎文殊師利白佛言世尊我實無見亦無見相爾時舍利弗白文殊師利我今不解汝之所說云何如是見於如來文殊師利答舍利弗大德舍利弗我不如是見於如來舍利弗白文殊師利

如汝所說轉不可解文殊師利答舍利弗不可解者
卽般若波羅蜜般若波羅蜜非是可解非不可解舍
利弗白文殊師利汝於衆生起慈悲心不汝爲衆生
行六波羅蜜不復爲衆生入涅槃不文殊師利答舍
利弗如汝所說我爲衆生起慈悲心行六波羅蜜入
於涅槃而衆生實不可得無相無形不增不減舍利
弗汝常作是念一一世界有恒河沙等諸佛住世恒
河沙劫說一一法教化度脫恒河沙衆生一一衆生
皆得滅度汝有如是念不舍利弗言文殊師利我常
作是念文殊師利答舍利弗如虛空無數衆生亦無
數虛空不可度衆生亦不可度何以故一切衆生與
虛空等故舍利弗白文殊師利若一切衆生與虛空
等汝何故爲衆生說法令得菩提文殊師利答舍利
弗菩提者實不可得我當說何法使衆生得乎何以
故舍利弗菩提與衆生不一不二無異無爲無名無
相實無所有爾時世尊出大人相肉髻光明殊特希
有不可稱說入文殊師利菩薩摩訶薩法王子頂還
從頂出普照大衆照大衆已乃徧十方一切世界是
時大衆觸此光明身心快樂得未曾有皆從座起瞻
仰世尊及文殊師利咸作是念今日如來放此奇特

微妙光明入文殊師利法王子頂還從頂出普照大
衆照大衆已乃徧十方非無因緣必說妙法我等但
當勤修精進樂如說行如是念已各白佛言世尊如
來今日放此光明非無因緣必說妙法我等渴仰樂
如說行如是白已默然而住爾時文殊師利白佛言
世尊如來放光加我神力此光希有非色非相不去
不來不動不靜非見非聞非覺非知一切衆生無所
觀見無喜無畏無所分別我當承佛聖旨說此光明
令諸衆生入無相慧爾時佛告文殊師利善哉善哉
汝善快說吾助爾喜文殊師利白佛言世尊此光明

者是般若波羅蜜般若波羅蜜者是如來如來者是
一切衆生世尊我如是修般若波羅蜜爾時佛告文
殊師利言善男子汝今如是說深般若波羅蜜我今
問汝若有人問汝有幾衆生界汝云何答文殊師利
白佛言世尊若人作如是問我當答言衆生界數如
如來界佛告文殊師利若人問汝衆生界廣狹云何
汝云何答文殊師利白佛言世尊若人作如是問我
當答言如佛界廣狹文殊師利若復問汝衆生界繫
在何處當云何答世尊我當答言如如來繫衆生亦
爾文殊師利若復問汝衆生界住在何處當云何答

世尊我當答言住涅槃界佛告文殊師利汝如是修
般若波羅蜜般若波羅蜜有住處不文殊師利白佛
言世尊般若波羅蜜無有住處佛告文殊師利若般
若波羅蜜無住處者汝云何修汝云何學文殊師利
白佛言世尊若般若波羅蜜有住處者我無所修我
無所學佛告文殊師利汝修學般若時有善根增減
不文殊師利白佛言世尊無有善根可增可減若有
增減則非修般若波羅蜜世尊不爲法增不爲法減
是修般若波羅蜜不斷凡夫法不取如來法是修般
若波羅蜜何以故世尊般若波羅蜜不爲得法故修
不爲不得法故修不爲修法故修不爲不修法故修
世尊無得無捨是修般若波羅蜜何以故不爲生死
過患不爲涅槃功德故世尊若如是修是修般若波
羅蜜不取不受不捨不放不增不減不起不滅故世
尊若善男子善女人作是思惟此法上此法中此法
下非修般若波羅蜜何以故無上中下法故世尊我
如是修般若波羅蜜佛告文殊師利一切佛法非增
上耶文殊師利白佛言世尊佛法菩薩法聲聞緣覺
法乃至凡夫法皆不可得何以故畢竟空故畢竟空
中無佛法凡夫法佛法凡夫法中無畢竟空何以故

空不空不可得故佛告文殊師利佛法無上不文殊師利白佛言世尊無有一法如微塵許名爲無上何以故檀波羅蜜檀波羅蜜空乃至般若波羅蜜般若波羅蜜空十力十力空四無所畏十八不共法乃至薩婆若薩婆若空空無無上無上中無空空不空畢竟不可得故世尊不可思議法是般若波羅蜜佛告文殊師利汝不思惟佛法耶文殊師利白佛言世尊我若思惟佛法我則見佛法無上何以故無生死故世尊五陰十二入十八界畢竟不可得一切佛法亦不可得不可得中無不可得不可得故世尊般若波

羅蜜中凡夫乃至佛無法無非法我當思惟何等法乎佛言善男子若無思惟汝不應說此凡夫法此緣覺法乃至不應說此是佛法何以故不可得故世尊我實不說凡夫法乃至佛法何以故不修般若波羅蜜故佛言善男子汝亦不應作如是意此欲界此色界此無色界何以故不可得故世尊欲界欲界性空乃至無色界無色界性空中無說我亦無說世尊修般若波羅蜜不見上不見不上何以故世尊修般若波羅蜜不取佛法不捨凡夫法何以故畢竟空中無取捨故佛告文殊師利善哉善哉汝能如是說深

般若波羅蜜此是菩薩摩訶薩印文殊師利若善男子善女人非於千萬佛所深種善根得聞此法乃至無量無邊佛所深種善根乃得聞此甚深般若波羅蜜不生怖畏文殊師利復白佛言世尊我當承佛威神當更說甚深般若波羅蜜佛告文殊師利善哉善哉恣聽汝說文殊師利白佛言世尊若不得法生是修般若波羅蜜何以故諸法無有性故若不得法住是修般若波羅蜜何以故諸法如實故若不得法滅是修般若波羅蜜何以故諸法寂滅故世尊若不得色是修般若波羅蜜乃至不得識是修般若波羅蜜

何以故一切諸法如幻如炎故世尊若不得眼是修般若波羅蜜乃至不得意是修般若波羅蜜若不得色乃至不得法不得眼界色界眼識界乃至不得法界意識界是修般若波羅蜜若不得欲界是修般若波羅蜜乃至無色界亦如是世尊若不得檀波羅蜜是修般若波羅蜜乃至不得般若波羅蜜是修般若波羅蜜若不得佛十力四無所畏乃至十八不共法是修般若波羅蜜何以故內空故乃至無法有法空故世尊若得生住滅非修般若波羅蜜若得五陰十二入十八界非修般若波羅蜜若得欲界色界無色

界非修般若波羅蜜若得檀乃至般若若得佛十力
乃至十八不共法非修般若波羅蜜何以故以有得
故世尊若善男子善女人聞此甚深般若波羅蜜不
驚不疑不怖不退當知是人久於先佛深種善根文
殊師利復白佛言世尊若不見垢法不見淨法不見
生死果不見涅槃果不見佛不見菩薩不見緣覺不
見聲聞不見凡夫是修般若波羅蜜何以故一切諸
法無垢無淨乃至無凡夫故世尊若見垢淨乃至見
凡夫非修般若波羅蜜世尊若見垢法差別淨法差
別乃至見佛差別凡夫差別非修般若波羅蜜何以

故般若波羅蜜無差別故佛告文殊師利善哉善哉
是真修行般若波羅蜜文殊師利汝云何供養佛文
殊師利白佛言世尊若幻人心數滅我則供養佛佛
告文殊師利汝不住佛法耶文殊白佛言世尊佛無
法可住我云何住佛告文殊師利若無佛法可住誰
有佛法文殊白佛言世尊無有有佛法者佛告文殊
師利汝今已到無所著乎文殊白佛無著則無到云
何世尊問已到無著佛告文殊汝住菩提不文殊白
佛言世尊佛尚不住菩提何況我當住菩提乎佛告
文殊師利汝何所依作如是說文殊白佛我無所依

作如是說佛告文殊汝若無依爲何所說文殊白佛如是世尊我無所說何以故一切諸法無名字故爾時長老舍利弗白佛言世尊若菩薩摩訶薩聞此深般若波羅蜜不驚疑怖畏必定得近阿耨多羅三藐三菩提不爾時彌勒菩薩白佛言世尊若諸菩薩摩訶薩聞此深法不驚疑怖畏得近阿耨多羅三藐三菩提不爾時有天女名無緣白佛言世尊若有善男子善女人聞此深般若波羅蜜不驚疑怖畏當得聲聞法緣覺法菩薩法佛法不爾時佛告舍利弗如是如是舍利弗若諸菩薩摩訶薩聞此深般若波羅蜜

不驚疑怖畏必定當得阿耨多羅三藐三菩提是善男子善女人當爲大施主第一施主勝施主無等施主當具足戒忍辱精進禪定智慧當具諸功德成就相好自不怖畏令人不怖畏究竟般若波羅蜜以不可得無相無爲成就第一不可思議法故佛告文殊師利汝何所見何所樂求阿耨多羅三藐三菩提文殊師利白佛言世尊我無見無樂故求菩提佛告文殊師利若無見無樂亦應無求文殊師利白佛言世尊我實無求何以故若有求者是凡夫相佛告文殊師利汝今真實不求菩提耶文殊白佛我真實不求

善提何以故求善提者是凡夫相佛告文殊師利汝爲定求爲定不求文殊白佛若言定求定不求定求不求定非求非不求是凡夫相何以故善提無住處故佛告文殊師利善哉善哉汝能如是說般若波羅蜜汝先已於無量佛所深種善根久修梵行諸菩薩摩訶薩樂深法者應當如所說學如所說行文殊白佛我不於無量佛所深種善根不久修梵行何以故我若種善根則一切衆生亦種善根我若修梵行則一切衆生亦修梵行佛告文殊師利汝何見何證說如是語文殊白佛我無見無證亦無所說世尊我不見凡夫不見學不見無學不見非學非無學不見故不證爾時舍利弗白文殊師利汝見佛不文殊師利答舍利弗我尚不見聲聞人何況當見佛何以故以不見諸法故謂爲菩薩舍利弗白文殊師利汝今決定不見諸法耶文殊師利答舍利弗大德大比丘汝止不須復說舍利弗白文殊師利謂爲佛者是誰語言文殊師利答舍利弗佛非佛不可得無有言者無有說者舍利弗善提者不可以言說何況有佛可言可說復次大德舍利弗汝說佛者是誰語言此語言不合不散不生不滅不去不來無有一法可與相應

無字無句大德舍利弗欲見佛者當如是學爾時舍利弗白佛言世尊此文殊師利所說新發意菩薩所不能解文殊師利答舍利弗如是如是大德舍利弗菩提非可解新發意者云何當解舍利弗白文殊師利諸佛如來不覺法界耶文殊師利答舍利弗諸佛尚不可得云何有佛而覺法界舍利弗法界尚不可得云何當有法界爲諸佛所覺舍利弗法界者卽是菩提菩提者卽是法界何以故諸法無界故大德舍利弗法界佛境界無有差別無差別者卽是無作無作者卽是無爲無爲者卽是無說無說者卽無所有舍利弗白文殊師利一切法界及佛境界悉無所有耶文殊師利答舍利弗無有無不有何以故有及不有一相無相無一無二故舍利弗白文殊師利如是學者當得菩提耶文殊師利答舍利弗如是學無所學不生善道不墮惡趣不得菩提不入泥洹何以故舍利弗般若波羅蜜畢竟空故畢竟空中無一無二無三無四無有去來不可思議大德舍利弗若人言我得菩提道是增上慢說何以故無得謂得故如是增上慢人不堪受人信施有信人不應供養舍利弗白文殊師利汝何所依作如是說文殊師利答舍利

經
文殊師利菩薩摩訶薩經
十一
弗我無所依作如是說何以故般若波羅蜜與諸法
等故諸法無所依以平等故舍利弗白文殊師利汝
不以智慧除斷煩惱耶文殊師利答舍利弗汝是漏
盡阿羅漢不舍利弗言不也文殊師利言我亦不以
智慧除斷煩惱舍利弗言汝何所依作如是說不怖
不畏文殊師利言我尚不可得當有何我而生怖畏
舍利弗言善哉善哉文殊師利快說如是甚深般若
波羅蜜爾時佛告文殊師利言善男子有菩薩摩訶
薩住菩提心求無上菩提不文殊師利白佛言世尊
無菩薩住菩提心求無上菩提何以故菩提心不可

得無上菩提亦不可得五無間罪是菩提性無有菩
薩起無間罪心求無間罪果云何有菩薩住菩提心
求無上菩提菩提者是一切諸法何以故色非色不
可得故乃至識非識亦不可得眼非眼不可得乃至
意非意不可得色非色不可得乃至法非法不可得
眼界非眼界乃至法界非法界亦不可得生非生不
可得乃至老死非老死亦不可得檀波羅蜜非檀波
羅蜜不可得乃至般若波羅蜜非般若波羅蜜亦不
可得佛十力非佛十力不可得乃至十八不共法非
十八不共法亦不可得菩提心無上菩提皆不可得

不可得中無可得不可得是故世尊無菩薩住菩提
心求無上菩提者佛告文殊師利汝意謂如來是汝
師不文殊師利白佛言世尊我尚不可得何況當有
意謂佛是我師佛告文殊汝於我有疑不文殊白佛
言世尊我尚無決定何況當有疑何以故先定後疑
故佛告文殊師利汝不定言如來生耶文殊白佛如
來若生法界亦應生何以故法界如來一相無二相
二相不可得故文殊師利汝信諸佛如來入涅槃不
文殊師利言一切諸佛卽涅槃相涅槃相者無入無
不入佛告文殊師利汝言諸佛有流轉不文殊師利

白佛言世尊不流轉尚不可得何況流轉當可得佛
告文殊師利如來無心唯如來前可說此語或漏盡
阿羅漢及不退菩薩前可說此語若餘人聞此語則
不生信當起驚疑何以故此甚深般若波羅蜜難信
難解故文殊師利白佛言世尊復何等人能信此甚
深法佛告文殊師利一切凡夫能信此法何以故如
來無心一切凡夫亦無心故文殊師利白佛言世尊
何故作如是說法新發意菩薩及阿羅漢咸皆有疑
願聞解說佛告文殊如實相法性法住法位實際中
有佛有凡夫差別不文殊白佛言不也世尊佛告文

殊若無差別何故生疑文殊白佛言世尊無差別中有佛有凡夫不佛言有何以故佛與凡夫無二無差別一相無相故佛告文殊汝信如來於一切衆生中最勝不文殊師利白佛言世尊我信如來於一切衆生中最勝世尊若我信如來於一切衆生中最勝則如來成不最勝佛告文殊汝信如來成就一切不可思議法不文殊師利白佛言世尊我信如來成就一切不可思議法世尊我若信如來成就一切不可思議法如來則成可思議佛告文殊師利汝信一切聲聞是如來所教化不世尊我信一切聲聞是如來所

教化世尊我若信一切聲聞是如來所教化則法界成可教化佛告文殊師利汝信如來是無上福田不世尊我信如來是無上福田世尊我若信如來是無上福田如來則非福田佛告文殊師利汝何所依作如是答我文殊白佛言世尊我無所依作如是答世尊無所依中無勝無不勝無可思議無不可思議無教化無不教化無福田無非福田是時以佛神力地六種震動一萬六比丘衆以無可取心得解脫七百比丘尼衆三千優婆塞衆四萬優婆夷衆遠塵離垢得法眼淨六萬億那由他諸天遠塵離垢得法眼

淨是時長老阿難卽從座起偏袒右肩右膝著地合掌恭敬白佛言世尊何因何緣此地大動爾時佛告阿難此說般若波羅蜜往古諸佛皆於此處說此法以是因緣故此地震動爾時長老舍利弗白佛言世尊此文殊師利所說不可思議爾時世尊告文殊師利如舍利弗所說此文殊師利所說不可思議爾時文殊師利白佛言世尊若不可思議則不可說若可說則可思議不可思議者無所有彼一切聲亦不可思議不可思議者無聲佛告文殊師利汝入不可思議定不文殊師利白佛言不也世尊若我入不可思

議定者我則成可思議世尊心無心我當云何入不可思議定復次世尊我初發菩薩意言我當入不可思議定我今無此意當入不可思議定世尊如初學射先作此意我當射朔射朔成已後作是念我當射皮射皮成已復作是念我當射木射木成已復作是念我當射鐵射鐵成已無復前意隨其箭中皆能徹過我亦如是昔初發意求入不可思議定我於今日無復此意當入不可思議定何以故此定不可思議故爾時舍利弗白佛言世尊文殊師利未應得住何以故離此不可思議定更有寂靜定是其所應得故

文殊師利白舍利弗言汝云何知離此不可思議定更有寂靜定大德舍利弗若此不可思議定可得者可離此定有寂靜定若此不可思議定不可得者彼寂靜定亦不可得何以故以此不可思議定不可得故彼亦不可得復次大德舍利弗無有衆生不得此定者一切衆生皆得此定何以故一切諸心無心故彼無心性卽是此定是故一切衆生皆得此定爾時世尊歎文殊師利善哉善哉如汝所說是最勝義汝於久遠無量佛所深種善根能作是說文殊師利汝作是念我住般若波羅蜜能說此言不文殊師利白

佛言不也世尊我無此念世尊若我有此念住般若波羅蜜能說此言者我則住可得法世尊我若住我相則有是念是故世尊我不作此念住般若波羅蜜能說此言爾時佛告文殊師利誰當信汝所說文殊師利白佛言世尊若人不執生死及涅槃相是人信我所說又若人堅執有我若人具三毒此人不能信何以故見及煩惱無可滅故爾時世尊歎文殊師利善哉善哉汝能善說爾時長老摩訶迦葉白佛言世尊未來世誰能信此深法誰樂聽此法佛告迦葉卽今日四衆比丘比丘尼優婆塞優婆夷於未來世能

信此法聞說此深般若波羅蜜當知此法當求此法
迦葉譬如長者或長者子已失一大寶珠價直億萬
兩金大生憂惱後更還得生大歡喜憂惱悉滅如是
迦葉比丘比丘尼優婆塞優婆夷於未來世聞此最
深般若波羅蜜經與般若相應聞已生喜心得安樂
無復憂惱亦復如是當作是言我等今日得見如來
供養如來所以者何以得聞此甚深微妙六波羅蜜
故迦葉譬如三十三天見波利質多羅樹初生炮時
作如是念此炮不久必當開敷如是迦葉比丘比丘
尼優婆塞優婆夷聞此般若波羅蜜經心生歡喜亦

復如是迦葉此深般若波羅蜜如來滅後當住不滅
處處流行迦葉以佛力故未來世中若善男子善女
人當得此深般若波羅蜜迦葉如摩尼珠師見摩尼
寶心生歡喜不假思量卽知真僞何以故以慣見故
如是迦葉若人聞此般若波羅蜜相應法聞已歡喜
生信樂心當知此人先世已聞此般若波羅蜜從久
遠劫來已曾供養諸佛迦葉白佛言世尊此善男子
善女人今聞此法於未來世轉復信解佛告摩訶迦
葉如是如是如汝所說爾時文殊師利白佛言世尊
此法無行無相說此法者亦無行無相云何世尊說

有行相佛告文殊師利善男子善女人行相者所謂
信此法受持此法以無所得心故行亦無所得相亦
無所得文殊師利若善男子善女人樂此無所得當
聽此般若波羅蜜若善男子善女人欲得不退轉地
當聽此般若波羅蜜若善男子善女人欲信一切諸
法與法界等當聽此般若波羅蜜若善男子善女人
欲知一切諸法當聽此般若波羅蜜若人得信此義
當聽此般若波羅蜜若人不樂念一切諸法當聽般
若波羅蜜何以故此般若波羅蜜不見一切諸法故
文殊師利若善男子善女人欲知一切諸法不淨不

穢當聽此般若波羅蜜若善男子善女人欲得無疑
當聽此般若波羅蜜若善男子善女人欲慈悲徧覆
一切衆生不住衆生相不與世間諍當聽此般若波
羅蜜爾時文殊師利白佛言世尊般若波羅蜜無我
無我所無起無滅無因無果無可執持云何聽受而
得功德佛告文殊師利般若波羅蜜無作無滅非凡
夫法非聖人法非生死法非離生死法非涅槃法非
離涅槃法無得無失非可思議非不可思議若善男
子善女人如是聽受則與般若波羅蜜相應是爲功
德亦無功德復次文殊師利若菩薩摩訶薩欲得菩

薩定欲知一切諸佛名欲見一切諸佛世界欲聞一切諸佛所說法欲行諸佛法當學此般若波羅蜜爾時文殊師利白佛言世尊何故名般若波羅蜜佛告文殊師利般若波羅蜜者無量無邊無方無處無去無來無作無爲卽是一切諸佛法界故名般若波羅蜜文殊師利此般若波羅蜜是菩薩摩訶薩行處菩薩於此處行故名行處何以故以無處故卽是一切諸佛之母一切諸佛所從生故何以故以無生故是故文殊師利若善男子善女人欲行菩薩行具足諸波羅蜜當修此般若波羅蜜若欲得坐道場成無上

菩提當修此般若波羅蜜若欲以大慈大悲徧覆一切衆生當修此般若波羅蜜若欲起一切定方便當修此般若波羅蜜若欲得一切三摩跋提當修此般若波羅蜜何以故諸三摩跋提無所爲故一切諸法無出離無出離處若人欲隨逐此語當修般若波羅蜜一切諸法如實不可得若欲樂如是知當修般若波羅蜜一切衆生爲菩提故修菩提道而實無衆生亦無菩提若人欲信樂此法當修般若波羅蜜何以故一切諸法如實與菩提等如非衆生行不捨自性衆生行無所有故彼衆生行是非行彼非行是菩提

彼菩提是法界若欲不著此法當修般若波羅蜜文
殊師利若比丘比丘尼優婆塞優婆夷若受持般若
波羅蜜一四句偈爲他人說我說此人得不墮法何
況如實修行當知彼善男子善女人住佛境界文殊
師利若善男子善女人聞此甚深般若波羅蜜不生
怖畏當知此人受佛法印此法印者是佛所造是佛
所貴何以故以此法印無著法故若善男子善女
人爲此印所印當知是人隨菩薩乘決定不退不墮
聲聞辟支佛地爾時釋提桓因及諸天子從三十三
天雨細末梅檀及細末金屑又散鬱波羅華鉢頭摩

華拘物陀華分陀利華及曼陀羅華以供養般若波
羅蜜供養已作如是言我已供養無上無著最第一
法願我來世更聞此深般若波羅蜜若人已爲此深
般若波羅蜜印之所印願其未來復得聽受究竟成
就薩婆若智爾時釋提桓因白佛言世尊若善男子
善女人聞此般若波羅蜜一經於耳我爲增長佛法
故守護彼人面百由旬不令非人得其便也是善男
子善女人究竟當得阿耨多羅三藐三菩提我當日
日往到其所而設供養爾時佛告釋提桓因如是如
是憍尸迦當知彼善男子善女人具足佛法必定得

至阿耨多羅三藐三菩提爾時文殊師利白佛言唯願世尊以威神力持此般若波羅蜜久住於世爲欲饒益諸衆生故文殊師利說此語時以佛神力大地六種震動爾時世尊卽便微笑放大光明徧滿三千大千世界以威神力持此般若波羅蜜令久住世爾時文殊師利復白佛言世尊放此光明是持般若波羅蜜相佛告文殊師利如是如是文殊師利我放此光明是持般若波羅蜜相文殊師利汝今當知我已持此般若波羅蜜久住於世若有人不輕毀此法不說其過當知是人已爲此深般若波羅蜜印之所印

是故文殊師利我於久遠安住此印若人已爲此印所印當知是不爲魔王之所得便佛告帝釋汝當受持讀誦此經廣宣流布使未來世諸善男子善女人得此法印復告阿難汝亦受持讀誦廣爲人說時天帝釋及長老阿難白佛言世尊當何名此經我等云何奉持佛言此經名文殊師利所說亦名般若波羅蜜如是受持善男子若人於恒沙劫以無價寶珠布施恒河沙等衆生衆生受已悉發道心是時施主隨其所宜示教利喜令得須陀洹果至阿羅漢果是人所得功德寧爲多不阿難白佛言甚多世尊佛言

善男子若人起一念心信此般若波羅蜜經不誹謗者比前功德出過百倍千倍百千萬億倍乃至算數譬喻所不能知何況具足受持讀誦爲人解說是人所得功德無量無邊諸佛如來說不能盡何以故能生一切諸佛薩婆若故若虛空有盡則此經功德盡若法性有盡則此經功德盡是故文殊師利善男子善女人應勤行精進守護此經此經能滅生死一切怖畏能摧天魔所立勝幢能將菩薩到涅槃果示教訓導離於二乘爾時帝釋及以阿難俱白佛言世尊如是如是誠如佛言我等當頂戴受持廣宣流布唯

願如來不以爲慮如是三白言願不爲慮我等當頂戴受持佛說此經竟文殊師利等諸菩薩摩訶薩舍利弗等比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩睺羅伽人非人等一切大衆聞佛所說皆大歡喜信受奉行

文殊師利所說般若波羅蜜經

音釋

泥洹

梵語也亦云般涅槃耶此云滅度洹胡官切

跏趺

跏居牙切跌風無切跏趺交足

狹

胡夾切隘也

射明

射音明射埤也

屑

先結切碎也

薩婆若

梵語也此

云一切智若爾者切

30
1
2
3
4
5
6
7
8
9
200
1
2
3
4
5
6
7
8
9
210
1
2
3
4
5
6
7
8
9
220

音韻

魚經不

生

此云

根

根

骨

骨

此

此

此云

根

根

骨

骨

此

音韻

文

大

美

除

漢

麻

魚經不

骨

骨

骨

骨

骨

骨

骨

骨

骨

八
四十九終

八并道不異

其